

Redidxhuen Xten Jesucrist Ni Bacuua San Juan

Xtidx Dios najc te Niguii

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gac-cheeli guedxliuj, yunäjni Dios. ³ Xcient laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojp yäl nabajñ. Yäl nabajñga najc bianij xten rebejn. ⁵ Luxh bianijga rdimbicha' nez lo yäl cäjy, niluxh yäl cäjyga di niajcdi nusuiinini.

⁶ Guyu' te niguii birilaj Juan, ni baxhal Dios. ⁷ Laani biäädni te basule'ni diidx. Biädsule'ni diidx xcient bianij te nililajz guiraa rebejn diidx xcient bianij. ⁸ Laani dini gac bianij, laani biädsule'ni diidx xcient bianij. ⁹ Laa bianijpacga ni rusanij lastoo guiraa rebejn, luxh naj abiäädni lo guedxliujre.

¹⁰ Nani najc Diidxga guyu' lo guedxliujre, xcient laazani guc-chee guedxliujre, luxh di reben guedxliujre nililajz chu najni najcni. ¹¹ Biäädni loj rexpen Israel, niluxh rexpejñni direni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl rnibee gacreni xi'n Dios. ¹³ Laa reni'c ni di gac si'c xi'n beñ guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yäl nabajñ par tejpas lojreni.

14 Diidxga gujc te ben guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtadni, laani nadjpacni nani sanälajz nuurnu, nani rnii didxlili loonu. **15** Juan gunii xcuent Jesús. Guredxa'ni, räjpni:

—Laa dee ni rniä, nani siääd detzä sajcruni loä, sa'csi laani ganidni nabajñni loä.

16 Sa'csi guiraanu cua'nu xcälnasacduxhni, yälracnäj detz yälracnäj. **17** Leii xten Dios biädnä toMoisés, niluxh yälracnäj näjza redidxlili biädnä Jesucrist. **18** Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

*Juan ni rutiobnis gunii chuni'c najc Jesucrist
(Mt. 3:11-12; Mr. 1:7-8; Lc. 3:15-17)*

19 Dee najc diidx nani gunii Juan ni rutiobnis che baxhal rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

20 Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiääd.

21 Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäaznu jiääd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhal_ñ nuure. ¿Xhi rnii lu, chuxhni'c najclu?

²³ Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴ Rebejn_ñ ni baxhal_ñ redee najc reni rnireni “farisee”. ²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. ²⁷ Laa dee ni siääd detzä niluxh di nungäj_ñ nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojl reben guedxliuj. ³⁰ Lagajc xcuent dee ni rnä cheni guniä lojtu: “Detzä siääd te niguii ni sajcru loä, sa'csi ganidli narä agac nabajñni.” ³¹ Luxh dina niembeäni, per biähtiobnisä con nis te guluiä lo rexpejn_ñ Israel chu najcni.

³² Guniiza Juan stee diidx xcuentni, räjpni:

—Narä bahuiä biäjt Sprit Dzan xten Dios xhaguibaa si'c te palom guzudxini yejcni. ³³ Dina niembeäni, per nani baxhal narä gutiobnisä con nis, laani najni loä: “Cheni filu jiäjt Sprit Dzan xten Dios xhaguibaa si'c te palom, sudxini yejc te bejñ, laanini najc ni gutiobnis con Sprit Dzan xten Dios.” ³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejñni. ³⁶ Bahuiini lo Jesús che sasajni, dxejc gunii Juan, räjpni:

—¡Colhui! ¡Laa dee ni najc Xiił xten Dios!

³⁷ Biejn diajg guiro'p rexpejñpac Juan diidxga, dxejc sanajlreni Jesús. ³⁸ Che gubiré Jesús bahuiini siädnajlreni, dxejc räjpni:

—¿Xhi caguiiltu?

Räjp rebejngá:

—Mastr, ¿caro rbäjzlu?

³⁹ Badzu' Jesús diidxre, räjpni:

—Coltaa, te fiiu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesús.

⁴¹ Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabääznu jiääd.

⁴² Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälgä rlajz Jesús chää nez Galilee. Dxejc bidxaagni Felipe, räjpni lojni:
—Gudanajl narä.

⁴⁴ Felipe siääd guedx Betsaida, guedxro ni na-jcza lajdx Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La sajc guirii te beñsa'c guedx Nazare't, ä?

Räjp Felipe lojni:

—Gudaa, te fiilu.

⁴⁷ Che bahuii Jesús siääd Natanael nez lojni, räjpni:

—Colhuii te beñ Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjp Jesús lojni:

—Sa'csi rniä lojlu, “bahuiä suga'lü ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa' ni guyu' guedx Caná xten Galilee

¹ Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejnpacni, sa'csi bidonreni chääreni lo sa'ga. ³ Gubijdz bin. Dxejc räjp xnan Jesús lojni:
—Dirureni ga'p bin.

⁴ Dxejc badzu' Jesús diidxre räjpni:
—¿Xhicuent rniliu si'c loä, xnanä? Gajd xhorä guidzujn.

⁵ Niluxh räjp xnanni loj remos ni tre' ro'c:
—Colyejn guira'ti si'ctis ni guiniini lojtu.
⁶ Suga' xho'p guesguj nani rdxaj nis te rdiib naa rexpejñ Israel te racnayareni te si'c guisa' xleii toMoisés. Neñ tejga guesguijga ru' si'cti te gayuu litr nis. ⁷ Räjp Jesús loj remos:
—Colguchaj reguesguijre nis.

Dxejcti bachadoo rebejngani. ⁸ Dxejcti räjp Jesús lojreni:
—Colca' che'nni naj te colchanäni lo nani cahuii cayajc sa're.

Dxejc huinä remosga che'n bin lojni. ⁹ Che gu'dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:
—Guiraa rebejn rudeedreni binsa'c räxgaa rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga

bazäbdiidx yälrnibee xtelli luxh ni'cni huililajz rexpejnpacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejnpacni. Ro'c bia'nreni tio'p-choñ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungajxh lanij pascw xten rexpejñ Israel cheni rnalajzreni guxhijn ni gudejd guixhajg xten yälgujt neñ Egipto, ni'c sää Jesús guedx Jerusalén. ¹⁴ Neñ guidoro bidxälni xhidajl bejñ nani ruto' gon, xiil, palom näjza reni sobga' caguchaa melzijt. ¹⁵ Dxejc bejnni te chico't con gaii duu, gulääni regon con rexiiñ neñ guidoo. Batie'chni xcoobr rebejñ nani ruchaa melzijt, barexh-xhätni remexreni. ¹⁶ Räjrzani loj reni caguto' repalom:

—Colcuää redee, na'c rujntu rolizx xtagħi si'c te guii cadro rdo' guiraloj.

¹⁷ Dxejcti banajlajz rexpejnpacni xhi caj lo reguítz ni bacuaa redade' ni gunii xtidx Dios: “Gucnaj lazä xcuent ni runnäjreni rolizlu.”

¹⁸ Dxejcti gunabdiidx reni najc xpejñ Israel lojní, räjpreni:

—¿Xhi seen guluiilu loonu ɳaj te fiinu arajplu yälrnibee te abejnlu recosre?

¹⁹ Badzu' Jesús diidxre räjpní:

—Colgutzujl guidoore, luxh narä neñ chontis dxej sunchesacáni.

²⁰ Räjp rexpejñ Israel lojní:

—Tiubixho'p ijz guclaa ni guc-chee guidoore, ¿xhixh sajc gunchesacluni neñ chontis dxej, ä?

²¹ Niluxh laani caniini xcuent guidoo ni najc lagajc tiejxhni. ²² Ni'cni cheni gubañsacni loj rebengut, banajlajz rexpejnpacni rediidxre ni gunini, dxejc huililajzreni nani caj lo rexquijtz Dios näjza rediidx ni gunii Jesús.

Numbee Jesús guiraa rebejn

²³ Cheni guyu' Jesús guedx Jerusalén cadro cayajc lanij pascw, lał ni cayajc lanijga, xhidajl rebejn huililajz xtiidxnxi, bahuiizareni remilagwr ni bejnni. ²⁴ Luxh di Jesús nililajz xtidx rebejnaga, sa'csi arumbeeni xho najc rebejn. ²⁵ Niluxh dini niquiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

3

Jesús con Nicodem

¹ Guyu' te niguii lo rexpejñ refarisee ni laa Nicodem, najcni te beñroru loj reni rnibee rexpejñ Israel. ² Te guxhijñ biädxhiga'tzni nez loj Jesús, räjpni lojni:

—Mastr, nadonnu lo Dios siäädlu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliápac lojlu, nani di gaal stehuält, di gacdi fini xcälrnibee Dios xhaguibaa.

⁴ Dxejcti räjp Nicodem lojni:

—¿Xho gac gaal te bejn stehuält niluxh anajcni bengool? ¿Xhixh sajc chusacni xque' xnanni stehuält te galsacni, à?

⁵ Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxan xten Dios, di gacdi jiu'ni lo xcälrnibee Dios xhaguibaa. ⁶ Nani rajl xi'n ben guedxliujre, ni'c najctisni bejn guedxliuj, luxh nani rajl por Sprit Dxan xten Dios, Spritza najcni. ⁷ Na'c rdxelolju sa'csi rniä: “Nanabpac gaallu stehuält.” ⁸ Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

⁹ Badzu' Nicodem^m diidxre, räjpni:

—¿Xho mood sajc gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä? ¹¹ Rniliäpac lojlu, aguniinu xcient recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcient recos guedxliuj nani rniinu: ¿Xho chalilajz tu xtiidxnu palga guiniinu xcient recos xhaguibaa?

¹³ 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. ¹⁴ Lagajc si'cni guläsjiaa toMoisés bäl guib lo yajg neñ reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yälnabajn par tejpas.

Xho huinälajz Dios reben guedxliuj

¹⁶ 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yälnabajn par tejpas. ¹⁷ Sa'csi di Dios

nuxhal₁ xi'nni te gusnijtni rebejn₁ guedxliuj, alga baxhañnini te laa rebejn₁ neñ xtoj₁lreni xcuentni.

18 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. **19** Ni'cni dee najc yälñjtga: abiääd bianijga loj guedxliuj, biädnä Xi'n Diosni, niluxh rebejn₁ guedxliuj bidxaglajzrureni yälñacäjy cadro tre'reni, gulälazreni bianijga sa'csi xhet laadi najc xtzuunreni. **20** Guiraa reni rujn dzunguijdx, rbälaz bianijga, dizareni guibig loj bianijga, didi guluiloj bianijga rextzunguijdxreni. **21** Luxh reni rusooob didxlii, rbigreni loj bianijga, te bianijga ruluiloj najc rextzuunreni redzunsa'c xten Dios.

Rnisac Juan ni rutiobnis xcuent Jesús

22 Dxejcti biääd Jesús näjza rexpejnpacni nez lo reyuj xten Judea. Ro'c guyunäjnireni, batiobnisza rexpejnpacni rebejn₁. **23** Juan ni Rutiobnis cagutiobniszani bejn₁ te lajt ni laa Enón ni tre' gajxh Salim, salcsi ro'c yu' sijl nis. Ro'c sää rebejn₁ lojni te cagutiobnisnireni. **24** Dxejc gajdreni gusäu Juan neñ latzguiib.

25 Dxejcti gusloj rexpejn Juan cayujy diidx con gaii xpejñ Israel xcuent yäl̄riib ñaareni ni najc xcostumbr rexpejñ Israel. **26** Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn₁ asää lojni.

27 Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni. ²⁸ Lagajc la'tu nancheetu guniliä: “Dina gacä Crist ni cabäjtu jiääd.” Guniäza: “Narä nacä nani biädnijd lojni.” ²⁹ Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni. ³⁰ Nanab gacni laani beñroru, beñsajcru, biädla narä riajl gacä beñhuinru, ni guxiiru sajc lojni.

Nani siääd Xhaguibaa

³¹ 'Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. ³² Nani bahuiini, nani biejn diajgni, ni'c rusule'ni niluxh guxii rililajzreni xtiidxni. ³³ Nani rililajz diidx ni rusule'ni, bejnga ruluiloj gulipac najc xtidx Dios. ³⁴ Nani baxhal Dios, ni'c rnii xtidx Dios sa'csi che rudeed Dios Sprit xtelli, dini gudeed guxiini. ³⁵ Dad Dios sanälajzni xingaanni, abadeedzani guiraliiti chu ladzñaani. ³⁶ Nani rililajz xtidx xingaanni arajp yälnabajn par tejpas, luxh ni di chalilajz xtidx xi'nni, dini fii yälnabajn, siääd xcäldixe'ch Dios yejcni, sujn Dios castiigwni.

4

Rdexaag Jesús te gunaa Samaria

¹ Che gucbee Jesús abiejn diajg refarissee xhidajlru bejn sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpejnni ni catiobnis), dxejc ³ biriini Judea gubisacni nez Galilee.

4 Lał ni sasajni, nanab tedni nez Samaria. **5** Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. **6** Ro'c sojb te bisie ni rniireni "xpisie Jacoob". Sa'csi abadxajg Jesús siädsajni, gurejni ro bisiega. Agojl läidxej. **7** Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

8 Sa'csi rexpejnpacni asääreni guewdxga sasiireni xhi gauren.

9 Räjpti guna samaritanga lo Jesús:

—¿Xho mood rniablu nis loä, luj ni najc te ben Israel luxh narä nacä gunaa samaritan?

(Sa'csi di rexpejñ Israel chanä sa'reni rebejñ Samaria.) **10** Räjp Jesús lojni:

—Paru najnlu xhini'c najc yälrulaslajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajñ lojlu.

11 Räjpti gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisnabajngä, ä? **12** ¿La beñrorulu lo toxtadgoldoonu Jacoob ni basa'n bisiere cadro huä'p nis gu'ni, gu'za rexí'nni, näjza rexquidxaani, ä?

13 Badzu' Jesús diidxre lojni, räjpni:

—Guiraa reni rä' nis bisiere, siojlreni stehuält.

14 Luxh nani yä nis nani gudedä, diruni jiojl, sa'csi nis nani gudedä neñ lastooni sajcni si'c te bisie nani rdatis nisni te gudeedni yäl nabajñ par tejpas.

15 Dxejcti räjp gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jiädlä'pä nis ree.

16 Räjp Jesús:

—Huij, huitejdx chäälu gudanäni ree.

17 Räjp gunaa loj Jesús:

—Ruti chälä.

Räjp Jesús lojni:

—Laaca guniilu, **18** sa'csi aguyu' gaiili chäällu.

Luxh nani rbäznäjlu ɳaj dini gac chäällu; gulica najlu.

19 Che biejn diajg gunaaga si'c, räjpni:

—Dad, rchaloä najclu te niguii ni rnii xtidx Dios. **20** Retoxtaggoldoonu gojñreni Dios lo dajnre, luxh la'tu rniitu guedx Jerusalén najc cadro nanab ganni Dios.

21 Räjp Jesús lojni:

—Gunaa, huililajz xtidvä, sidzujn or cheni nicla lo dajnre, niclaza guedx Jerusalén ditu chagajn Dad Dios. **22** La'tu rajntu Dios nani ditu gumbee, nuunu rajnnu Dios nani rumbeenu; sa'csi yälruslaa bejn lo dojl siääd xcuent rexpejñ Israel. **23** Niluxh sidzujn or, luxh alabidzujnni, che reni gulipac rajn Dad, reni'c neñ lastooreni, lo xcäriejnreni sajñreni Dios. Sa'csi sa' bejñre rguiil Dad Dios te gañrenini. **24** Dios najc te Sprit. Reni rajn Dios nanab gañrenini neñ lastooreni, lo xcäriejnreni, guideb xtijpreni sa'csi rumbeerenni.

25 Räjp gunaa lojni:

—Ananä siääd Mesías ni laaza Crist. Cheni jiäädni, laani susule'ni guiraliiti loonu.

26 Räjp Jesús lojni:

—Narä ni caniä lojlu, nacä laani.

27 Dxejc bidzujn rexpejñpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlajzni, niclaza rut

gunabdiidxdi xhini'c caninäjni gunaaga. ²⁸ Dxejcti basa'n gunaaga xtie'ni, sä'tini guedxroga. Dxejcti räjpni loj rebejn:

²⁹ —Coltaa, fiftu te nigui ni gunii loä guira'ti nani abenä. ¿La et laadi dee Crist ni cabääznu jiääd, ä?

³⁰ Dxejc birii rebejnguejdxga, bidzujntireni lojni. ³¹ Reni najc rexpejnpacni canabduxhreni gau Jesús, räjpreni:

—Mastr, gudajw.

³² Laani räjpni:

—Narä rapä xhi gauä nani ditu gumbee.

³³ Dxejcti räjp rexpejnpacni lo sa'reni:

—¿Xhaa yu' chu abiädnä xhi gudajwni, ä?

³⁴ Räjp Jesús:

—Yälrajw xtenä najc gunä si'cni rlajz nani baxhal narä, näj guluxä xtzuunni. ³⁵ La'tu rnitu riäädx tajp bääi te guire' cose'ch. Narä rniä colguliäs lojtu, colfisa'c loniaa, abiquijtz regäjl, agojl guire' cose'ch. ³⁶ Nani rujn dzuun rutie' cose'ch rca'ni xcuentni, luxh ni caca'ni najc par yälnabajn par tejpas, te tejsi guibalaznäj nani gule'c binij näj nani batie' cose'ch. ³⁷ Sa'csi gulii najc diidx nani rnii bejn, rniireni: “Tejni rbe'c binij, ste'cani rutie'ni.” ³⁸ Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹ Xhidajl reben Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.” ⁴⁰ Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej.

41 Dxejc xhidajlurení huililajz xtiidxni ni guniini lojpacreni. **42** Dxejcti räjpreni loj gunaaga:

—Dirunu chalilajz ganaxtis xcuent diidx ni guniili loonu, sa'csi lagajc nuure abiejn diajgnu xtiidxni, ni'c nancheenu dee najcpac ni ruslaa rebejen guedxliuj loj dojl. Laani naje Crist ni cabääznu jiääd.

Basiajc Jesúsc xi'n te bejn ni rujn xtzuun gubier

43 Che gudejd tio'p dxej, biriini guedx Samaria, huinuuni xnezyujni nez Galilee. **44** Sa'csi lagajc Jesúsc gunii, räjpni: Te bejn nani rnii xtidx Dios di reben lajdxpacni chanälajz xtiidxni. **45** Che bidzujnni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejnni.

46 Gubisacni, bidzujnni guedx Caná xten Galilee cadro bejnni bidxaa nis gujcni bin. Dxejcti guyu' te dade' nani rujn xtzuun ɻeii. Guedx Capernaum naga' te xi'nni cayacxhuu. **47** Che biejn diajg dade'ga abirii Jesúsc Judea, abidzujnni nez Galilee, huijni lo Jesúsc, gunabduxhni lojni chääni te gu-siajcní xi'nni nani naga' cuentro, ameerli guetni. **48** Dxejcti räjp Jesúsc lojni:

—Paru ditu fii reseen, remilagwr, ditu chalilajz chuni'c nacä narä.

49 Dade' ni rujn xtzuun ɻeii, gunii lojni, räjpni:

—Do'o Dad, te di guet xi'nä.

50 Räjp Jesúsc lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni roliznzi, birii rexmosni, huichaglojni, badeedreni diidx nabajñ xi'nni.

⁵² Dxejcti gunabdiidxni:

—¿Cor̄ti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³ Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejñ ni yu' roliznzi huililajzreni Jesús najc ni cabäjzreni jiääd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejñ Israel, dxejc huij Jesús guedx Jerusalén. ² Guedx Jerusalén, gajxh ro' puert ni laa xten rexiił, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga ⁴ sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganid-doo che guiniibni, riajcni lo xhitis yälguijdx ni rajcni. ⁵ Ro'c guyu' te beñ racxhuu nani agujc galbitzubixhujñ ijz cayacxhuuni. ⁶ Cheni bahuui Jesús naga'ni, badeedzani cuent lacti xchero raxchuuni, räjpní lojni:

—¿La rlajzlu jiajclu?

⁷—Dad —räjp beñ racxhuuga lojni—, dina gapä chu gusäl narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huitie, guläs xta'lu, guzaj, huij.

⁹ Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, ¹⁰ ni'c räjp rexpejn Israel lo bejn ni biajcga:

—Nadxej najc dxej ni rusilajz bejn. Di gacdi guulu xta'lu.

¹¹ Laani räjpni:

—Nani basiajc narä, laani naj loä: “Guläs xta'lu, gusaj.”

¹² Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³ Dxejcti beñ racxhuu ni biajcga dini gaan, sa'csi gunitloj Jesús, biriini ro'c lał ni tre' xhidajl bejn lajtga. ¹⁴ Che bidxaagni Jesús stehuält neñ guidoro, räjp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentroru.

¹⁵ Sä'ti bejnga, huiye'tzni loj rexpejn Israel laa Jesús ni basiajcni. ¹⁶ Ni'cni gusloj rexpejn Israel carinajlreni Jesús, rlajzreni guiga'ni te ju'trenini, sa'csi rujnni redzuunga dxej ni rusilajzreni. ¹⁷ Luxh räjp Jesús lojreni:

—Xtadä Dios ḥajli cayujnniuzuun, ni'cni näjza narä cayunäuzuun.

¹⁸ Ni'cni rlajzru rexpejn Israel ju'tni, xhet ganaxdi sa'csi rujnniuzuun dxej ni rusilajzreni,

per näjza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

¹⁹ Badzu' Jesú斯 diidxre räjpni lojreni:

—Rniliä, rniliäpac lojtu. Di gacdi gun Xi'n Diosuzuun xtebni, palga dini fixgaa rujn Xtadni dzuunga, sa'csi guira'tisuzuun ni rujn Xtadni, dzuunga rujnza Xi'nni sigajc rujn Xtadni. ²⁰ Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelojtu. ²¹ Sigajc ni rliäs Dios rebengut, rudeddi yälnabajn lojreni, sigajcza sudeed xi'nni yälnabajn lo renani rlajztisni. ²² Nicla Dad di gun yälguxhtis, alga badeedni guiralii yälguxhtis gun Xi'nni, ²³ te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhalñi biäädni.

²⁴ 'Rniliä, rniliäpac lojtu, nani rucuadiajg xtidvä, ni chalilajzzani nani baxhal narä, ni'c rajpni yälnabajn par tejpas; niluxh dini ted lo yälguxhtis, alga abiriini lo yälgujt, agudejdni lo yälnabajn. ²⁵ Rniliä, rniliäpac, sidzujn or, luxh alabidzujnni, cheni siejn diajg rebengut xse' Xi'n Dios, luxh reni riejn diajgni diidxga sibansacreni lo rebengut. ²⁶ Si'cni rajp Dad Dios yälnabajn lagajcsi laani, sigajcza badeedni lo Xi'nni ga'pni yälnabajn lagajcsi laazani. ²⁷ Badeedzani lojni yälrnibee te gunni yälguxhtis, sa'csi najcni Xi'n Dios ni gujc Niguii. ²⁸ Na'c rdxelojtu rediidxre, sa'csi sidzujn or cheni guiraa reni yu' neñ baa siejn diajgreni xse'ni ²⁹ siriizareni neñ baa. Reni bejn dzunsa'c

siriireni te guibansacreni loj yälnabañsa'c, niluxh reni bejn dzunguijdx, siriireni te guibansacreni te tedreni lo xcälguxhtis Dios.

Nani ruluiloj yälrnibee ni rajp Jesúś

³⁰ 'Xhet rajcdi runä lagajcsi narä. Sigajc ni riejn diagä, sigajcza runä yälguxhtis. Luxh yälguxhtis ni runä laaca najcni sa'csi dina quilä gunä nani rlazäts, rguiläts gunä si'c ni rlajz Dad nani baxhal narä. ³¹ Palga naräts rniä diidx lagajc xcientä, xhet sajcdi diidxga. ³² Yu' stee nani rnili diidx xcientä, luxh nancheä diidx ni rniini xcientä sacduxhni, guliipacni. ³³ La'tu abaxhal_{tu} chu huij loj Juan, huinabdiidxreni lojni "chu najc bejngä", niluxh badzu'ni diidx lojreni guniini diidx guliipac xcient chu nacä. ³⁴ Narä dina jiuä diidx nani rnii rebejn xcientä luxh canisacä rediidxre te laatu lo xtoj_{ltu}. ³⁵ Juan gujc si'c te bajl ni ralguij, basanijzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuuun nani baniidx Xtadä gunä, lagajc redzuun ni runä, huenliisi ruluilojreni Xtadä Dios baxhal narä. ³⁷ Xtadä ni baxhal narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni nen lastootu, sa'csi di lajztu chalii xtiidx nani baxhal narä. ³⁹ La'tu rolduxhtu reguijtz xten Dios sa'csi rchalotu si'c sidxäl_{tu} yälnabaj_n par tejpas, luxh lagajc reguijtzga rusule' chu narä. ⁴⁰ Naadditu jiäädtu loä te ga'ptu yälnabaj_n par tejpas.

⁴¹ 'Narä dina quilä chu bejn guiliä'p xpala'nä nez loä. ⁴² Luxh narä anumbeätu, ananä ditu

chanälajz Dios neñ lastootu. ⁴³ Narä biälä xcuent Xtadä, luxh ditu gucuadiajg xtidxä; paru jiääd chu stee bejn̄ xcuentcani, ni'c sii sucuadiajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quil xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtadä. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nililajzpactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, xho chalilajztu rediidx nani caniä lojtu, ä?

6

Bayaan Jesús gaii mil niguii

(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ² Sanajl xhidajl bejñni sa'csi rhuiireni remilagwr ni rujnni lo rebeñracxhuu. ³ Dxejcti huä'p Jesús yejc te dajn, ro'c gurenäjni rexpejnpacni. ⁴ Niluxh ameer gac lanij pascw xten rexpejñ Israel, cheni rudedreni xquixhtios lo Dios xcuent dxej ni biriireni Egipto. ⁵ Cheni guläs Jesús lojni, bahuiini siääd xhidualduxh bejn̄, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejñre?

⁶ Dxejc räjpzani si'c te don xhi xhigab gun Felipe, luxh laani anajnni xho gunni. ⁷ Räjp Felipe lojni:

—Di tio'p gayuu beex yätxtiil gal te gaureni tlagaj.

8 Tej rexpejnpacni ni laa Andrés, bejtz Simón Pedr, räjp lojni:

9 —Ree suga' te biuux ca' gaii yätxtiil con tio'p bälj, ¿xhixh sajl ni'c gau rebeñ xhidajlre?

10 Dxejcti räjp Jesús:

—Colyetz loj rebejñre cuereni.

Yuduxh guixa' ro'c. Dxejcti gurej reniguii. Si'cti gaii mil najc reniguii. **11** Dxejcti cua' Jesús yätxtiilga, badeedni xquixtios lo Dios, gudisni yätxtiilga lo rexpejnpacni. Dxejcti rexpejnpacni gudisrenini loj rebejñ nani sobga'. Sigajcza gudisreni rebälj si'ctisni rlajzreni gauren. **12** Che gulujx gudajwreni, gudxaj xque'reni, dxejcti räjp Jesús loj rexpejnpacni:

—Colgutie' guiraa reyätxtiilbiujy nani bia'n te xhet nitdi.

13 Batie'tireni reyätxtiilbiujy, guläsreni tzubitio'p dxijm yätxtiilbiujy nani bia'n lo gaii yätxtiilga nani gula' gudajwreni. **14** Che bahuii rebejñga reseen, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabääznu jiääd lo guedxliuj.

15 Sas che gucbee Jesús cayujnreni xhigab jiädnaazrenini te niujnreni gacni ɻeii te guinibeeni lojreni, biriini ro'c, xtebni gubisacni nen dajn.

Gusaj Jesús lo nisdoo

(Mt. 14:22-27; Mr. 6:45-52)

16 Che gojl guxhijn, bidzujn rexpejnpacni lo nisdoo. **17** Biu'reni neñ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni. **18** Gusloj cayäjs nisdoo xcuent te beduxh nani cabi'. **19** Ni'cni che gusajreni si'cti gaii o xho'p kilómetro, bahuiireni

siäddzungajxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:
—Naräni. Na'c guidxejbtu.

²¹ Dxejcru cuäjbreni biu'ni neñ barcw. Dxejcti bidzungajcreni stelaad lo yuj cadro sääreni.

Caguiil rebejn Jesús

²² Che bara yääl, rebejn nani bia'n stelaad ro' nisdoo, bahuiireni asanä rexpejnpacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad. ²⁴ Che bahuii rebejn ruti Jesús ro'c, niclaza rexpejnni, biu'reni neñ rebarcw, sääreni guedx Capernaum satiilreni Jesús.

Jesús najc yätxtiil xten yäl nabajn

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. ²⁷ Na'c guntuuzuun ganax par yälrajw nani rnitloj. Colyejnuzuun par yälrajw nani di nitloj, ni runiidx yäl nabajn par tejpas. Yalrajwre suniidx Xi'n Niguii, sa'csi loj rebejn baluui Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnuuzuun ni rlajz Dios?

²⁹ Räjp Jesús lojreni:

—Dee najc ni rlajz Dios guntu: chalilajztu xtidx narä, nani baxhal_{ni}.

³⁰ Räjpreni lojni:

—¿Xhi seen gunlu te guihuiinu xcälrnibeelu te cholilajznu xtiidxlu? ¿Xhiuzuun rujnlu?

³¹ Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäädpac xhaguibaa. ³³ Sa'csi yätxtiil xten Dios najc bejn ni siääd xhaguibaa, niluxh laani rudeedni yäl nabajn par tejpas loj reben guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yäl nabajn nani riäj_l jiääd; chutis ni jiääd loä diruni guiliaan, niluxh chutis ni rililajz xtidxä diruni jiojl par tejpas.

³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtadä loä, siäädni loä, niluxh chutis ni jiääd loä dina cuälazäni.

³⁸ Sa'csi narä siälä xhaguibaali te gunä si'c ni rlajz Xtadä, xhet si'cdi ni rlazädi. ³⁹ Dee najc ni rlajz Xtadä nani baxhal_{ni} narä: na'c nit nicla tej renani baniidxni loä, te guspan_{sacä} guiragajcreni che gal dxej lult ni riäj_l jiääd. ⁴⁰ Scree rlajz nani baxhal_{ni} narä: guiraa renani fii lo Xi'n Dios, näj chalilajzreni xtiidxni, xca'reni yäl nabajn par tejpas niluxh narä suspan_{sacä}reni che gal dxej lult ni riäj_l jiääd.

41 Rediidxre bejn gusloj casiejy rexpejñ Israel xcent Jesús sa'csi räjpni: “Narä nacä yätxtiil ni biäjt xhaguibaa.” **42** Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtni?

43 Dxejc räjp Jesús lojreni:

—Na'c rusieinäj sa'tu. **44** Rut rajcdi riääd loä palga di Xtadä ni baxhal narä jiädnäni loä, te guspançsacäni che gal dxej lult ni riäjl jiääd. **45** Loj reguijtz ni bacuua redade' ni gunii xtidx Dios caj scree: “Suluii Dios guiraareni.” Ni'cni guiraa reni rucuadiajg xtidx Xtadä, reni rsieed lojni, reni'c ni jiääd loä.

46 'Dinä guiniä yu' chu abahuii lo Dios; tejtis ni abahuii lojni: nani baxhal Dios, ni'ctis abahuii lojni. **47** Rniliä lojtu che rniä: nani chalilajz xtidvä, ni'c rajp yälhabajñ par tejpas. **48** Narä nacä yätxtiil nani rudeed yälhabajñ. **49** Retoxtadtu gudajw mana ni bastejb Dios lo reyubijdz, dxejcti gujtzareni. **50** Dee najc yätxtiil ni siääd xhaguibaa, te chutis ni gau yätxtiilga dini guet. **51** Narä nacä yätxtiilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' reben guedxliuj yälhabajñ najc lagajc bältiexhä.

52 Dxejcti gusloj casiejy rexpejñ Israel räjpreni:

—¿Xho gac guniidz dee bältiejxhni guidauunu, ä?

53 Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejnni, digacdi ga'ptu yälhabajñ. **54** Nani gau bältiexhä, nani yäza xtienä, ni'c rajp yälhabajñ par tejpas,

niluxh suspañsacäni che gal redxej lult. ⁵⁵ Sa'csi bältiexhä najc te yälrausa'cpac, xtienä najcza te yälräsa'cpac. ⁵⁶ Nani gau bältiexhä, nani yäza xtienä, ni'c yu'pac con narä, luxh narä yu'äza con laani. ⁵⁷ Xtadä ni baxhal narä rajp yälhabajn par tejpas. Narä nabañä xcuent laani. Sigajcza nani rajw narä, sibajnzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajnni par tejpas.

⁵⁹ Recosre baluui Jesús neñ te guidobäz lał ni guyu'ni guedx Capernaum.

Diidx xten yälhabajn par tejpas

⁶⁰ Che biejn diajgreni si'c, xhidajl rexpejnpacni räjp:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? ⁶² ¿Xhicha guntu paru fiiu chä'p Xi'n Dios ni gujc Niguii cadro guyu'ni galoo? ⁶³ Sprit xten Dios najc ni rudeed yälhabajn; bältiehxhi xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälhabajn par tejpas. ⁶⁴ Luxh lałtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzñaa reben dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtadä jiädnäni loä.

66 Lagajc dxejc gusloj cabicaj xhidajl rebejñ ni agujc xchej gusanäj Jesús, dirureni nisianäj Jesús.

67 Dxejcti räjp Jesús loj guidzubitio'p rexpejñpacni:
—¿La nägajcza la'tu rlajztu jiitu, ä?

68 Badzu' Simón Pedr diidxre, räjpni:
—Dad, ¿chuloj chonnu? Luj rajplu diidx ni rudeed yäl nabajñ par tejpas. **69** Nuure abiolilaaznu, anajnnu najclu Crist Xi'n Dios nani nabajñ.

70 Badzu' Jesús diidxre, räjpni:
—¿La et lagajc narädi guleä guitzubitio'ptu?
Luxh tejtu najc bendxbab.

71 Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

7

Di rebejtz Jesús chalilajz

1 Che gujcti recosre, cansaj Jesús nez reyuj xten Galilee, di rlajzni jia'nni nez reguedx Judea sa'csi rlajz reben ro'c ju'tni. **2** Luxh ameer gal lanij xten cose'ch xten guidoguijd, te relanij xten rexpejñ Israel. **3** Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejñpaclu fii redzunro nani rujnlu. **4** Sa'csi rut rujndi xtzuunni xhiga'tz palga rlajzni gacbee bejñ xhi dzuun rujnni, te gumbee bejnni. Palga rujnpaclu redzuunre, baluiini lo guiraa reben guedxliuj.

5 Guniireni si'c lojni sa'csi nicla rebejtzni di chalilajz xtiidxni. **6** Dxejcti räjp Jesús lojreni:

—Gajd xhorä guidzujñ, niluxh par la'tu xhitis or najc hueen. **7** Di gacdi guidxe'ch reben guedxliuj

lojtu, luxh rdxe'chreni loä sa'csi narä rniliä xcuentreni: dzunguijdx najc xtzuunreni. ⁸ La'tu colchäj lanij; narä dina cha'a lanijga sa'csi gajd xhorä gal.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. ¹¹ Dxejcti caguiil rexpejñ Israelni lo lanijga, räjpreni:

—¿Concha niguiiga?

¹² Lo rebejñ xhidaalga yu' xhidajl bejñ ni cagusiejyreni xcuentni. Yu'reni räjp: "Hueen na jcni", per sgaiireni räjp: "Dini gac hueen. Cagusgueeni rebenguejdx."

¹³ Nicla tejreni xhet casäbdiidxireni xhini'c caniri. Direní guinii dip sa'csi rdxejbreni rexpejñ Israel nani rnibee.

¹⁴ Agurojl lanij, che biu' Jesús neñ guidoro. Dx ejcti gusloj caguluiini. ¹⁵ Dxejcti rdxeloj rexpejñ Israel nani rnibee, räjpreni:

—¿Xho najn dee guiraloj, niluxh dini nisieed xleii toMoisés?

¹⁶ Badzu' Jesús diidxre, räjpni:

—Yälruluii nani caluiyä et xtenädini, xten nani baxhal naräni. ¹⁷ Palga yu' chu rlajz gun nani rlajz Dios, sacbeeni la xten Dios najc reyälruluii xtenä, o la lagajcsi narä rbää diidx ni caguluiä.

¹⁸ Nani rusule'ni diidx nani lagajc laani rbääni, ni'c rniini diidxga te guiliä'p rebejñ xpala'nni, luxh nani rguiil chä'p xpala'n nani baxhalni, ni'c ni rnii didxlíi, xheti yälrusguee neñ lastooni. ¹⁹ ¿La di toMoises nuniidx leii lojtu, ä? Niluxh nicla tejtu di

gusoob xtidx leiiga. ¿Xhicuent rlajztu ju'ttu narä, pes?

²⁰ Badzu' reben xhidajlga diidxre, räjpreni:

—¡Xprit beñdxab yu' lastoolu! ¿Chuni'c rlajz ju'tlu?

²¹ Badzu' Jesús diidxre lojreni, räjpni:

—Tejtisuzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. ²² Ni'cni baniidx toMoisés lojtu yälru'tu bee, luxh etlaadini guläxtiejnini, agac guläxtiej retoxtadgoldootuni. La'tu rusälta bee rebiuux mase najcni dxej nani rusilajztu. ²³ Mbaj pes, palga rajc rusälta bee bejn te dxej nani rusilajztu didi nit xleii Moisés, ¿xhicuent rdxe'cthu loä sa'csi basiacäpac te bejn te dxej nani rusilajztu, ä? ²⁴ Na'c rujntu yälguxhtis si'ctis ni rlajztu. Colyejn yälguxhtis con yälguxhtis xten Dios.

Rusule' Jesús casiäädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguiilreni te ju'trenini, ä?

²⁶ Ani asuga', caniini nez loj guiraa rebenguejdx, niluxh rut rudxojndini. ¿Xhaa ahuililajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siääd niguiire, niluxh che jiääd Crist, rut gacbeedi caro siäädni.

²⁸ Caguluii Jesús nen guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajn*ni*, luxh la'tu ditu gumbeeni. ²⁹ Luxh narä numbeäni, sa'csi lojni biriä, laani baxhalzani narä.

³⁰ Dxejc rlajzreni niniaazrenini, niluxh rut gu-naazdini, sa'csi gajd xhorñi gal. ³¹ Xhidajl bejn lo rebeñ xhidajlga huililajz xtiidxni, dxejcti räjpreni:
—Cheni jiääd Crist, ¿xhixh sujnrungi milagwr loj nani rujn dee, ä?

Ruxhal refarisee guixhajg guiniaaz Jesús te jiäuni

³² Che biejn diajg refarisee xhi canii rebejn xcuent Jesús, laareni näja rebixhojz nani rnibee lo rebixhojz baxhal̄reni guixhajg te guiniaazreni Jesús te jiäunni. ³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal̄ narä. ³⁴ Siguiltu narä, niluxh ditu guidxäl narä, sa'csi cadro cha'ä digacdi jiäädtu.

³⁵ Ni'c gunii rexpejñ Israel lo sa'reni; räjpreni:
—¿Cacharo chääni ni'c di gadci guidxälnuni?
¿Xhaa sijni loj rexpejñ Israel nani nare'ch nez ladx regriegos te guluiini regriegos? ³⁶ ¿Xhi säloj diidxre nani guniini loonu: “Siguiltu narä, niluxh ditu guidxäl narä, sa'csi cadro cha'ä di gadci jiäädtu”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpnii:

—Palga yu' chu cayojl, sujiäädni loä te yäni.

³⁸ Nani chalilajz xtidxä si'cni caj lo rexquijtz Dios neñ lastoolini siliejn nisnabajñ.

³⁹ Rediidxre guniini xcuent Sprit Dxan nani churu jiädläjz neñ lastoo reni rililajz xtiidxni, sa'csi gajd Sprit Dxan jiääd, sa'csi gajd Jesús guibañsac lo rebengut.

Gucgala' rebejn

40 Lo rebeñ xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

41 Yu'zareni räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiääd Crist nez Galilee. **42** Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadro siääd torei David.

43 Dxejcti gucgala' rebejn xcuent Jesús.

44 Yu'reni rlajz chääni pres luxh rut biajxdi gunaazni.

Di reguxhtis chalilajz biääd Crist

45 Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

46 Badzu' reguixhajg diidxre, räjpreni:

—¡Gajdpac te bejñ guinii si'cni rnii bejngá!

47 Dxejc räjp refarisee:

—¿La näj la'tu abasgueeni, ä? **48** ¿Xhixh loj regubier o loj refarisee yu' chu tej ni ahuililajz xtiidxni, ä? **49** Reben xhidajlre ni di gan xleii toMoisés, reni'c agunijtpac.

50 Nicodem, nani huij lojni te guxhijn, najc te refarisee. Laani räjpni lojreni:

51 —Lo xleiinu caj: digacdi guntu yälguhtis te bejñ palga gajdtu gucuadiagxgaa xtiidxni, te don xhi bejnni.

52 Badzu'reni diidxre räjpreni lojni:
—¿La näjza luj siäädlu Galilee, ä? Bil̄sa'c xhi caj
lo xquijtz Dios, suhuilu nicla tej niguii nani rnii
xtidx Dios di jiääd nez Galilee.

Gunaa nani biga' carälguijxh con te niguii

53 Dxejc cade tejreni sii rolizreni.

8

1 Dxejcti huij Jesús nez dan Oliib. **2** Rsilru gubi'ni, bui'ni neñ guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluiinireni. **3** Dxejcti biääd refarisee näjza reben najn, biädnäreni te gunaa nani biga' carälguijxh con te niguii. Basujrenini galäii reni suga' ro'c. **4** Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni. **5** Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

6 Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. **7** Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojl̄ni, ni'c ganid-doo sugucuaani guij yejc gunaare.

8 Basabsac lojni lo yuj sanuutis cagucuaani con bicueñaani lo yuj. **9** Luxh laareni che biejn diaj-greni diidxga, sa'csi yu' xtojl̄reni, gusloj biriiren tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni

suga' galäiireni. ¹⁰ Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Guna, ¿con reni cabe'c xquejlu? ¿La rut bacuaquijdiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yälñacäjy, sica'ni bianij ni rudeed-pac yälñabajn.

¹³ Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidvä, gulipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵ La'tu rujntu yälgxuhtis si'c najctis rexhigab xten beñ guedxliuj. Narä rut lojdi runä yälgxuhtis. ¹⁶ Palga gunä yälgxuhtis, yälgxuhtis xtenä laaca najcni, sa'csi et xtebädi runä yälgxuhtis, sa'csi narä näj Xtadä ni baxhal narä rieñnuni.

¹⁷ Luxh lo xleiitu caj diidxre: “Che rnii tio'p beñ tejsi diidx, didxliini, colchalilajzni.” ¹⁸ Narä rniliäpac diidx lagajc xcuentä, dxejcti Xtadä nani baxhal narä rniliizani diidx xcuentä.

¹⁹ Räjpreni loj Jesús:

—¿Caro yu' xtadlu?

Räjp Jesús lojreni:

—Ditu gumbee nicla narä, niclaza Xtadä; paru niembeetu narä, niembeezatu Xtadä.

²⁰ Rediidxre gunii Jesús cadro *re'* gojn, lał ni caguluiini nen guidoro niluxh rut gunaazdini sa'csi gajd xhorni guidzujn.

Cadro cha'ä, la'tu digacdi jiäädtu

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojlту sejttu. Cadro cha'ä di gacdi jiäädtu.

²² Räjp rexpejñ Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³ Räjp Jesús lojreni:

—La'tu najctu ben lo yuj. Narä nacä ben ni siääd jiaa. La'tu najctu ben guedxliujre. Luxh narä dina gacäti ben guedxliujre. ²⁴ Ni'cni guniä lojtu, sejttu lo xtojlту sa'csi palga ditu chalilajz nacä chu nacä, sejtpactu lo xtojlту.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guniä, xhidajza yälgxuhtis rlazä gunä xcuenttu sa'csi ditu chalilajz, per nani baxhal narä najc ben gulipac; nani biejn diagä guniini, redidixga rniä loj reben guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxhalni, luxh xhetliidi runä lagajcsi xcuentä. Si'cni baluui Dad narä, si'ctis rniä.

²⁹ Nani baxhal narä sugaränjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ Lal ni caniini si'c, xhidajlreni huililajz xtidxni.

Rexi'n Dios con remos xten dojl

³¹ Dxejcti räjp Jesús lo rexpejñ Israel nani huililajzga:

—Palga la'tu sutijptu, guzoobtu xtidxä, dxejc gulipac najctu xpenä. ³² Sumbeezatu nani najc didxgulii, niluxh didx guliga suslaa la'tu lo xtojltu.

³³ Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

³⁴ Räjp Jesús:

—Riniliä, rniliäpac lojtu, chutis ni rujn dojl najc mos xten dojl. ³⁵ Nani najc mos, dini jia'n rolijz xlamni guideb guibajnni, niluxh nani najc xi'n lamga, ni'c sii sia'n rolijz xtadni guideb guibajnni.

³⁶ Ni'cni, palga ruslaa xi'nni la'tu lo dojl, dxejcsii apac gulaatu. ³⁷ Ananä najctu xagdoo toAbraham, luxh la'tu rlajztu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

³⁹ Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. ⁴⁰ Luxh ɳaj rlajztu ju'ttu narä, sa'csi rniliä rediidx nani baluui Dios loä. ¡Di toAbraham niujn si'c! ⁴¹ La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejñdi; nuure tejtis xtadnu yu', laani najc Dios.

42 Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcientä siälädi; Dios baxhal narä. **43** ¿Xhicuent ditu gacbee rediidx ni rniä lojtu? Sa'csi di rlajztu gucuadiajgtu rextidxä. **44** Xtadtu najc bëndxab. La'tu najctu xi'nni, rlajztu guntu nani rlajztisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii. **45** Niluxh narä rniä didxlii, ni'c ditu chalilajz xtidxä. **46** ¿Chu tejtu sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä? **47** Nani najc xpejñ Dios, ni'c rucuadiajg xtidx Dios. Sa'csi la'tu ditu gac xpejñ Dios, ni'cni ditu gucuadiajg xtidxä.

Anse to Abraham, agac nabajñ Crist

48 Dxejcti badzu' rexpejñ Israel diidxre, räjpreni lojni:

—Laaca rniinu luj najclu te bejñ ni siääd Samaria, bëndxab yu' lastoolu.

49 Räjp Jesús lojreni:

—Xhet beñdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä. **50** Luxh narä dina quilä chu guiliä'p xpala'nä, yu' chu rguiil guiliä'p bejñ xpala'nä, niluxh laani ru-jnni yalguxhtis. **51** Rniliäpac lojtu, nani riu, nani rusooib xtidxä, dipacni guet.

52 Dxejcti räjp rexpejñ Israel lojni:

—Naj agucbeepacnu yu' beñdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”⁵³ ¿Xhixh sajcrulu lo toxtadnu Abraham, ä? Ni laani gujtni, gujta reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtiostu.⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni.⁵⁶ ToAbraham toxtadgoldootu, bibalajzni sa'csi nuhuini dxej nani jiälä, niluxh bahuinini dxejc bibalazduxhni.

⁵⁷ Dxejcti räjp rexpejn Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

⁵⁸ Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini neñ guidoro, gudejdni galäireni. Sä'tini.

9

Basiajc Jesús te bejn ni natiä'p balojni che gojllini

¹ Che cadejd Jesús te lajt, bahuini sobga' te bejn ni che gojlli bejnga agajc natiä'p balojni. ² Dxejc gunabdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuazjnni, ni'c natiä'p balojni che gojlni, ä?

³ Räjp Jesúš:

—Nicla laani, niclaza xcuazajnni di niujn dojl. Si'c gojlni te xcuent ni sajc bejnre suhuii bejn xho najc xtzuun Dios. ⁴ Nanab gunä xtzuun nani baxhal narä ɳaj ni najc rdxee, sa'csi cheni guidzujn guxhijn rut gacdi gun dzuun. ⁵ Lałni yu'ä lo rebejn güedxliuj, nacä xpianij güedxliuj.

⁶ Che gulujx guniini si'c, batiobxhejnni lo yuj, bejnni bajn con xhejnni, gudääbnini con bicueñaani lo rebaloj lotiä'pga. ⁷ Dxejcti räjpni:

—Huij, huitiib lojlu neñ nis ni laa Siloé. Lajnisga sälojza “baxhalni”.

Dxejcti huijni. Huitiibni lojni. Che gubi'ni, aruhuiini. ⁸ Dxejcti rexpisin lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arięñ balojlu?

¹¹ Dxejcti räjp dade'ga nani gujc lotiä'p:

—Dade' ni laa Jesúš bejn bajn, gudääbnini baloä, dxejcti najni: “Huitiib lojlu neñ te nis ni laa Siloé”, dxejcti che huitibä loä, lagajc dxejc bien loä.

¹² Dxejcti räjpreni lojni:

—¿Con dade'ga ɳaj?

Räjpti bejnga:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee.
¹⁴ Luxh sa'csi najcni dxej ni rusilajzreni che bejn Jesùs bajn ni gudääbni loj lotiä'pga te biajc balojni, ¹⁵ gunabdiidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajn gudääbni loä, dxejc gudibä loä, naj aruhuiä.

¹⁶ Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni ben dojl?

Ni'cni gula' sa'reni, gujcreni tio'p gala'. ¹⁷ Dxejcti gunabdiidxsacreni lo ni gujc lotiä'p:

—Luj a', ¿xhi rniliu xcuent nani basiajc balojlu?

Dxejc räjp dade'ga:

—Narä rniä najcni te bejn nani rnii xtidx Dios.

¹⁸ Luxh rexpejn Israel naaddireni chalii lajzreni gujcpacni te lotiä'p ni abieñ balojni, dxejcti gurejdixreni xcuzajn dade' ni gujc lotiä'pga. ¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹ Niluxh dinu guidon naj xho mood arien lojni, dizanu guidon chu basiajc balojni.

Colguiniabdiidx lojni, anajcni bengool, lagajc laani sajc guiniini xhi gusajcni.

²² Si'c gunii xcuazajnni sa'csi rdxejbreni rexpejñ Israel, sa'csi agac bia'nreni diidx sibääreni, dirureni gusaan jiu' neñ guidoo chutis te bejñ ni naa Jesús najc Crist nani abiääd. ²³ Ni'cni räjp rexcuzajnni:

—Anajcni bi'n ni ayu' xcäriejnni. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu ben dojl najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni ben dojl o la dini gac. Tejtis nanä: gucä lotiä'p, luxh ɳaj arięn baloä.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejnni basiajcni balo-jlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlajztu guinisacäni? ¿Xhixh näj la'tu rlajztu gactu xpejñpacni, ä?

²⁸ Dxejc gudilnäjrenini, räjpreni:

—Luj najclu xpejñni, per nuure najcnu xpejñ toMoisés. ²⁹ Anadonnu guninäj Dios toMoisés, niluxh dade're dinu guidon casiäädni.

³⁰ Dxejcti räjp dade'lojreni:

—Dee najc te cos ni guidxeloj bejñ: la'tu ditu gan casiäädni, ɻniluxh laani basiajcni baloä!

³¹ Nadoncheenu di Dios cuadiajg xtidx rebeñ dojl; palga yu' chu rajñ Dios, ni rusoobzta xtiidxni,

rucuadiajg Dios xtidx sa' bejnga. ³² Che guslojli guedxliuj gajd diajgnu jiejn xcuent te bejn nani rusiajc baloj te bejn lotiä'^p nani natiä'^p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluiilu nuure?

Dxejcti guläärenini neñ guidoro, barilaag-wrenini.

³⁵ Biejn diajg Jesús guläärenini neñ guidoro, che bidxälñini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuiilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojñnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rieñ lojni sajcreni lotiä'^p.

⁴⁰ Refarisee nani sugaränjreni, che biejn diajgreni diidxre, räjpreni:

—¿Xhixh najczanu bejn lotiä'^p, ä?

⁴¹ Räjp Jesús:

—Paru najctu lotiä'^p, rut gucuaquijditu xtojltu, naj sa'csi rniitu rieñ lojtu, sicaquijtu rextojltu.

10

Jesús najc te baxtorsa'c

1 'Rniliä, rniliäpac lojtu, nani di jiu' ro' gurajl xte rexiiil, alga richu'ni stelaad, rä'pni cuä' gurajl, ni'c najcni te gubaan. **2** Nani riu' nez ro' gurajl xten rexiiil, laani najc xpaxtoorreni. **3** Che guidzujñ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbe-jdxni rexiiilga, tebgaj xiilga yu' lajni, rinäzanireni cadre naga' guixasa'c. **4** Che rii rexiiilga neñ gurajl, sanä baxtoorgareni, luxh numbee rexiiilga xse'ni, ni'c rsianäjreni baxtoorga. **5** Luxh dipacreni chanä te baxtoor nani direni gumbee, ruxuñreni lojni sa'csi direni gumbee xse' garenca bejn.

6 Bij Jesús rediidxga lojreni, niluxh direni ni-acbee xhi säloj ni guniini.

7 Dxejcti gunisac Jesús diidx lojreni; räjpni:
—Rniliä, rniliäpac lojtu, narä nacä si'c roxlä' xcurajl rexiiil. **8** Guiraa reni abiääd galoo, najcreni ganax gubaan luxh di rexiiil nucuadiajg xse'ni. **9** Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälhi guixasa'c gauni.

10 'Ni najc gubaan riäädtisni te cuanni, te ju'tni, te guxhinžani, niluxh narä siälä te ga'ptu yälñabañsa'c, yälñabajñ par tejpas. **11** Narä nacä baxtorsa'c; luxh baxtorsa'c sudeed lagajc xcälnabajñni xcient rexiiilni. **12** Niluxh te mos ni rajxh, di gac baxtoorpac, ni xhet xtendini najc rexiiil, che rhuiini siääd te cuyo't, ruxuñni, li rbälazni rexiiil. Dxejc rniaaz cuyo't rexiiil, rutie'chzani rexiiil. **13** Mosga ruxuñ sa'csi najcni mostis, luxh dini jiu xhi rsiajc rexiiil.

14 'Narä nacä baxtorsa'c; numbeä reni najcpac rexilä; rexilä numbeezareni narä **15** sigajc numbeä Xtadä narä, sigajc numbeäza Xtadä; luxh sudedä xcälhabanä xcuent rexiilga. **16** Rapäza ste cuaa xiiil, ni di gac xten gurajre; näja laareni nanab chaxiä, te gusobdiajgreni xtidvä, te guidxagsa' guiro'p cuaareni, gacreni tejtis gurajl, tejtisza baxtoar.

17 'Narä siguixäza xcälhabanä, guetä, te dxejcru siliässacä xcälhabanä, guibañsacä, ni'cni sanälajz Xtadä narä. **18** Rut sajcdi ju't narä, lagajc narä gudedä xcälhabanä, guetä. Rapä yälrnibee te gudedä xcälhabanä, guetä, rapäza yälrnibee te xcasacä xcälhabanä te guibañsacä, sa'csi dee najc yälrnibee ni baniidx Xtadä loä.

19 Xcuent rediidxre gula' sa' rexpejn Israel, gujcreni tio'p gala'. **20** Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcní rajc. Xhigac rcuadiajgtu xtiidxni.

21 Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

Rdxe'ch rebejn loj Jesucrist

22 Lagajc neñ redxejga gujc lanij xten xquidoo rexpejn Israel guedx Jerusalén. **23** Najcni bái najl. Biu' Jesús guidoro, sasajni nez neñ cordoor ni laa xten Salomón. **24** Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

25 Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcälrnibee Xtadä, huenliisi ru-luijreni chuni'c nacä. ²⁶ La'tu ditu chalilajz sa'csi ditu gac rexilä. ²⁷ Rexilä numbee xse'ä, luxh narä numbeäzareni, riädnajlzareni narä. ²⁸ Narä rudedä yälnabajñ par tejpas loj rexilä, luxh direni nitloj par tejpas. Rutza laadi nani sajc gudzucajreni ladzñaä. ²⁹ Xtadä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzñaä Xtadä. ³⁰ Narä näjza Xtadä najcnu tejsi.

³¹ Dxejc gulässac rexpejn Israel guij, te nu-cuaareni yejc Jesús. ³² Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn gucuaatu guij yecä?

³³ Dxejcti räjp rexpejn Israel lojni:

—Xcient redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Ben guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”? ³⁵ Nancheenu digacdi guidxaa xquijtz Dios. Palga gulalajni redios rebejñ nani bejn yälguxhtis loj rexpejn Israel, dxejc ³⁶ naj ¿xhicient guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. ³⁷ Palga dina gunä redzuun xten Xtadä, na'c chalilajztu rex-tidxä. ³⁸ Luxh palga runnäni, mascä ditu chalilajz xtidvä, colchalilajz ni ruluii reyälmilagwr nani runä, te gacbeetu par tejpas, Xtadä yunäj narä, narä yunääza laani.

³⁹ Che rlajzreni niniaazrenini stehuält, laani biriini ladzñaareni.

⁴⁰ Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan. ⁴¹ Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhreni huililajz xtiidxni ro'c.

11

Gujt Larz

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. ² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcni. ³ Ni'cni baxhal guiro'p bälre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluijlojni xcälrnibee Dios. Te guluijlojza yälracxhuure xcälrnibee Xi'n Dios.

⁵ Sanälajz Jesús Mart, bäljni, näjza Larz, ⁶ che räjpreni lojni cayacxhuu Larz, bia'nni stio'p dxej cadre yu'ni. ⁷ Dxejcti räjpni loj rexpejñpacni:

—Colcho', chonnu stehuält región Judea.

⁸ Räjp rexpejñni lojni:

—Mastr, gajd gac xchej rlajz rexpejñ Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p orди yu' lo tebdxej, ä? Palga sa bejn rdxee, dini jiajb sa'csi ruhuini lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejnpacni lojni:

—Dad, palga agudiesni, pet siajcni.

¹³ Jesús canii lojreni agujt Larz, niluxh rexpejnpacni bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz. ¹⁵ Rbalazä sa'csi rutinu ro'c, te chalilajztu xtidvä. Colcho' te chohuiinuni.

¹⁶ Dxejcti Tomás ni rniizareni “cua'ch”, räjpni lojresa'ni:

—Colcho' te guetnäzanuni.

Jesús najc yälbansac lo yälgujt

¹⁷ Che bidzujn Jesús lo guejdxga, agujc tajp dxej biga'tz Larz. ¹⁸ Guedx Betania tre' gajxh lo guedx Jerusalén, si'cti tio'p garol kilómetro. ¹⁹ Xhidajl rexpejñ Israel abidzujn, siädhuiireni Mart, näjza Marii, te di gac-huin lajzreni sa'csi gujt bisiajreni. ²⁰ Che gucbee Mart abidzujn Jesús, biriini huichaglojnini; niluxh Marii bia'n rolizzreni.

²¹ Dxejcti räjp Mart lo Jesús:

—Dad, paru suga'lú ree, di bisianä niejt. ²² Narä nanä suniidz Dios guiraa nani guiniablu lojni.

²³ Jesús räjpni lojni:

—Sibansac bisiajnlu.

²⁴ Räjp Mart lojni:

—Acananä sibañsacni che guidzujn dxej ni guibañsac bejn loj rebengut dxej lult che gun Dios yälguxhtis.

²⁵ Dxejc räjp Jesús lojni:

—Narä nacä yälruspañsac bejn loj rebengut, näjza yälnabajn par tejpas. Nani rililajz rextidxä, masä agujtni, sibañsacni. ²⁶ Chutis tej bejn ni nabajn ni chalilajz xtidvä, dini nitloj par tejpas, ¿riliiga lajzluni, ä?

²⁷ Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

Biin Jesús cuä' xpaa Larz

²⁸ Che guluux gunii Mart, huitejdxni bäljni Marii, xhiga'tz räjpni lojni:

—Abidzujn Mastr. Cabejdxzani luj.

²⁹ Che biejn diajg Marii rediidxga, huisugajcni, sahuiini Jesús. ³⁰ Gajd Jesús jiu' guejdxga, laltis suga'ni cadro bidxaagni Mart. ³¹ Rexpejn Israel nani biädcuenäj Marii, ni cahuui didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoонni.

³² Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'luree, di bisianä niejt.

³³ Che bahuui Jesús cayoon Marii, näjza rexpejn Israel ni siädnajl Marii, guc-huin lastooni, biääd te rsliajz lastooni. ³⁴ Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

35 Dxejcti biin Jesús. **36** Ni'cni cayäjp rexpejñ Israel:

—Colhuii, lacti sanälajznini.

37 Yu'zareni räjp:

—Dade're basiajc beñ lotiä'p. ¿Xha di niajcdi nusiajcní bejnre te di niejtni, ä?

Gubansac Larz

38 Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusätureni ro'ni. **39** Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

40 Dxejc räjp Jesús lojni:

—¿Et rniä lojlu, palga rililajztu, suhuiilu xcälrnibee Dios, ä?

41 Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. **42** Narä nanä guliica rucuadajglu xtidxä, luxh ñaj caniäni xcient rebejñ ni tre' ree, te chalilajzreni luj baxhallu narä.

43 Che gulujx guniini rediidxga, guredxa'ni räjpni:

—¡Larz! ¡Gudaa ree!

44 Dxejc birii bengutga neñ biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

45 Xcuent dzunrore huililajz rextidx Jesús xhidajl rexpejñ Israel nani huinajl Marii, che bahuiireni xhi bejn Jesús. **46** Yu' reni huihuij loj rexpejñ Israel ni laa farisee, bijreni diidx xhi bejn Jesús. **47** Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjzpzareni:

—¿Xho jiennu? Niguiire cayujn xhidajl milagwr. **48** Palga guisaannuni si'c, guiralii bejn silihajz xtidxnini, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlzareni lajdxnu.

49 Dxejc Caifás, bixhojzro ni riäjl gunibeeni lo rebixhojz ijzga, räjpni lojreni:

—La'tu xhetliidi najnditu. **50** Ditu gun xhigab laaca guet tejtis bejn xcient guideb guejdx, didi nitloj guideb lajdxnu.

51 Niluxh Caifás dini ninii diidxre xcientcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcient nación xten rexpejñ Israel. **52** Luxh xhet ganaxtis xcient nacionga, näjza te guire' guiraa rexpejñ Dios nani nare'ch loj guideb guedxliujre. **53** Ni'cni dxejliga bachaag rebejngä diidx te don xho gunreni gugu'treni Jesús.

54 Ni'cni diru Jesús nisiaj nez loj rexpejñ Israel. Biriini regióon Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejñpacni.

55 Guxii dxej cayäädx guidzujn lanij ni laa pascw ni rujn rexpejñ Israel. Xhidalduxh rebenguejdx huij guedx Jerusalén te gusiareni lastoorení, te gac

gunreni lanij xten pascw. ⁵⁶ Cansajreni caguiil-reni Jesús; che yu'zareni neñ guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebix-hojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudääb te gunaa se't ni' Jesús (Mt. 26:6-13; Mr. 14:3-9)

¹ Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebengut. ² Ro'c bejnreni te xchej te gau Jesús. Mart bateed xchejga, näjza Larz sob-ganäj Jesús näjza rexpejnpacni lo mex. ³ Dxejcti bidzuñnäj Marii si'cti garol litr se't ni rlianexh-duxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxe-jcni. Guideb neñ yu'ga gulanejxh se'tga. ⁴ Dxejcti räjp Judas Iscariot, xi'n Simón, ni najc te rex-pejnpac Jesús, lagajc ni abejn xhigab goto'ni Jesús, räjpni:

⁵ —¿Xhicuent di se'tre nido' chon gayuu denar te nidis meelga loj rebenproob? (Chon gayuuga najc si'cti ni xca' te niguii paru gunni dzuun tzubiteb bäii.)

⁶ Gunini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre ruchee meel, luxh rbääni meel lojga te rca'nini. ⁷ Ni'cni räjp Jesús lojni:

—Na'c gudxoijnluni; subasälxgaanini, che gajd guidzujn dxej nani guiga'tzä. ⁸ Dxej-yää'l yu' rebenproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajl xpejn Israel yu' Jesús roliz Larz ni gubañsac lo rebengut, bidzujnreni, xhet xcuentis Jesús. Biäädreni te fiizareni loj Larz nani baspañsacni lo rebengut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yää'l, rebejn xhidajl ni bidzujn lanij biejn diajgreni asiäddzujn Jesús guedx Jerusalén, ¹³ dxejcti batiu'reni ɳaa reyagzijn, biriireni neñ guewdx, sachaglojrenini. Guredxa'reni, räjpreni lo Jesús:

—¡Colguliä'p xpala'n Dios! ¡Chicbaa nani siääd xcient Dad nani najc ɻeii lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión. ¡Colhuii! Reii xtentu asiääd, bijbni dejtz te burbäz.

¹⁶ Di rexpejn pacni niacbee recosga che gujcreni, niluxh che gubañsacni loj rebengut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzobj redidxga.

¹⁷ Reben xhidajl ni sugaränjni che gurejdxni Larz te biriini neñ baa che baspañsacnini lo rebengut, bijzareni diidx xcuent guiraa ni bahuiireni. ¹⁸ Ni'cni

biädchagloj reben xhidajlgani, sa'csi abiejn diaj-greni laani bejnni milagwrre. ¹⁹ Ni'cni räjp refarisee lo sa'reni:

—Aruhuiitu xhet sajcdi jiennu. ¡Colhui! Empac sanajl guideb guedxliujni.

Riädtiil regriegw Jesús

²⁰ Yu' gaii bengriegw nadxaag lo rebejn ni biädted lanij guedx Jerusalén. ²¹ Rebejnre bidzujn loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biääd Felipe, räjpni loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujn or ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, neñ xhurc cadro cueni, te rianxtebni, guetni, dini guiliejn. Luxh palga guetni, siliejnni, rajcza te nisro lojni, rajc xhidajl xob binij. ²⁵ Nani sanälajz xcälnabajnni, sunijtnini, luxh nani rbälaz xcälnabajnni lo guedxliujre, sica'ni yälnabajn par tejpas. ²⁶ Palga yu' chu tej ni rlajz chu loä, sujiädnajlni xnezyuä, te cadro yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'nni.

Rníxgaa Jesús guetni

²⁷ Räjpzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre. ²⁸ Xtadä, bejn si'cni riäjl gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰ Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹ Naj abiääd xcälguxhtis Dios lo guedxliuj. Naj sibicaj xcälrnibee nani rnibee lo guedxliujre. ³² Naj, che guiliärsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Räjp rebejn lojni:

—Nuure biejn diajgnu bilreni lo leii, Crist ni jiääd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti räjp Jesús lojreni:

—Sterat'sti yu' bianij lojtu. Colsaj lał ni rajptu bianijga, te di guiniaaz yälxcäjy la'tu, sa'csi ni rsiaj loj nacäjy, dini gan caro chääni. ³⁶ Lał ni rajptu bianij, colchalilajz bianijga te gactu rex'i'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

Xhicuent di rexpejn Israel nililajz xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhal Dios lojreni. ³⁸ Ni'cni guzojb diidx nani gunii Isaías, ni gunii xtidx Dios galoro, räjpni: Dad, ¿chuni'c huililajz xtiidxlu?

¿Chuloj baluiilu xcälrnibeduxhlu, ä?

³⁹ Ni'cni di niajcdi nililajzreni, sa'csi guniiza Isaías, räjpni:

⁴⁰ Abascäjyni lojreni,
abennajdni lastooreni,
te di rebalojreni fii,
te di lastooreni gacbee,
te di gusiejch lajzreni,
te di gusiacäreni.

⁴¹ Rediidxre gunii Isaías, sa'csi bahuiini xcälrdimbicha' Jesús xhaguibaa, dxejc guniini xcuentni.

⁴² Dxejcti gaii rebejn ni rnibee huililajz xtiidxni che räjpni abaxhal Diosni, niluxh bidxejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni neñ guidoo. ⁴³ Sa'csi rdxaglajzrureni guiliä'p rebejn xpala'nreni luxh guxiiru rlajzreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtadä nani baxhal narä rililajzni. ⁴⁵ Nani ruhuii loä, ruhuiizani loj ni baxhal narä. ⁴⁶ Narä biälä si'c bajllo guedxliujre, te guiraanani chalilajz xtidxä, dirurení chu lo yälcäjy. ⁴⁷ Nani riendiajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis rebenguedxliuj, biälä te guslaä reben guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlni che gal

lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl nabajñ par tejpas. Ni'cni rediidx nani rniä, rniäreni si'cpacni gunii Xtadäni loä.

13

Jesús gudiibni ni' rexpejnpacni

¹ Che gajd gal dxe lanij ni laa pascw, najn Jesús asiäddzungajxh xorri, or ni jiunejzni lo guedxliujre te chääni lo Xtadni. Luxh sa'csi agajc sanälajzni rexpejnpacni nani yu' lo guedxliujre, sinälajzzanireni par tejpas.

² Ni'cni lał ni cayauxchejreni biu' beñdxab nen lastoo Judas Iscariote, xi'n Simón, te guto'ni Jesús.

³ Sa'csi agucbee Jesús abateed Xtadni guira'ti ladzñaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudojbni te tuäii, batejbnini xque'ni.

⁵ Dxejcti cua'ni nis neñ te chaa, guslojni gudiibni ni' rexpejnpacni, baspijdzni ni'reni con tuäiiga.

⁶ Che bidzujñni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejc räjp Jesús lojni:

—Nani cayunä dilu gacbeení naj, guixee-huijdx sacbeeluni.

⁸ Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹ Räjp Pedr lojni:

—Dad, na'c quiiblu ni'ätis näjza naä näjza yecä gudiib.

¹⁰ Räjp Jesús lojni:

—Nani agojz di guiquiin gazsacni; ni'tisni gudiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guniini: “Xhet guiraaditu naya.”

¹² Ni'cni che gulujx gudiibni ni' rexpejñni, got-sacni xhajbni, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjl quiibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamñni; diza te ni rij xmandaaad bejn gac beñroru loj nani baxhalñi. ¹⁷ Palga najntu recosre, chicbaazatu palga si'c guntu.

¹⁸ 'Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzni. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guchuinduxh lastooni, dxejc guniliini:

—Rniliä, rniliäpac lojtu, tejtu suto' narä.

²² Dxejc gusloj cadxeloj rexpejñni lo sa'reni, di jien chuchani'c cagusä'tni. ²³ Tej rexpejñni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcient caniini. ²⁵ Dxejc nani sobga' cuä'ni, gubi-gruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c. ²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj rebeñ ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijn.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguii, luxh lojni sienloj xcälrnibee Dios. ³² Palga suluiloj Xi'n Dios ni gujc Niguii xcälrnibee Dios, dxejc su-luilojza Dios xcälrnibee Xi'n Dios ni gujc Niguii, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejñ Israel si'cza rniä lojtu ɳaj: Di gacdi jiäädtu cadro cha'a. ³⁴ Te didxcoob rnibeä

guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa benguedxliuj najcpactu rexpenä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujn dxej jiäädlu ro'c.

³⁷ Räjp Pedr lojni:

—Dad, ¿xhicient digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' chon huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidvä. ² Yu' xhidalduxh yu' cadro rbäjz Xtadä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu.

³ Luxh palga chasucheä cadro cuääztu, che guluxäni, sibisacä, te chanäätu ro'c, te cadro yu'ä, ro'cza chutu. ⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

6 Räjp Jesús lojni:

—Narä nacä nezyuj. Narä nacä didxliipac, nacäza yälñabajñ. Por narätis sajc chää bejñ cadro rbäjz Xtadä. **7** Palga la'tu niembeetu chuni'c nacä, niembeezatu Xtadä. Luxh najli abiembepactuni salcsi acahuiitu lojni.

8 Räjp Felipe loj Jesús:

—Dad, basaan guihuiinu loj Xtadlu; ni'ctis rlaaznu.

9 Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtadä. ¿Xhicuent rniablu filu lo Xtadä, ä? **10** ¿La dilu chalilajz najrä yunää Xtadä, luxh Xtadä yunäjzani narä, ä? Rediidx nani rniä dina guiniäni lagajc xcuentä, sa'csi Xtadä ni yunäj narä laani rujn lagajc rextzuunni. **11** Colchalilajz xtidvä, che rniä narä yunää Xtadä, luxh Xtadä yunäj narä. O palga ditu chalilajzni sa'csi najcni xtidvä, colchalilajzni sa'csi abahuiitu rextzuun ni runä. **12** Rniliäpac lojtu, nani chalilajz xtidvä, sajc gunni redzuun nani runä, luxh sujnni dzunroru sa'csi sia'a cadro yu' Xtadä. **13** Luxh guiraa ni guiniablu lo Xtadä xcuentä, narä sunäni, te guluiloä xcälrnibee Xtadä. **14** Narä sunä xhitis ni guiniabtu por laä.

Ria'n diidx guxhal Jesús Sprit Dxan

15 Räjrzani:

—Palga sanälajztu narä, susoobtu xtidvä. **16** Dxejc siniabä lo Xtadä, te guniidxní stee nani gacnäjtu te chunäjní la'tu par tejpas. **17** Nalajznu, Xprit Dxan xten Dios, ni rnili. Di

gacdi xca' reben guedxliujni, sa'csi direni fii lojni, niclaza gumbeeranini. Niluxh la'tu numbeetuni sa'csi yunäjni la'tu, yu'ni neñ lastootu. ¹⁸ Dina gusanbisiäbä la'tu; sibisacä jiädhuiä la'tu. ¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabañä, la'tu nabajñzatu. ²⁰ Neñ redxejga, dxejc sacbeetu yunää Xtadä, la'tu yunäjtu narä, luxh narä yunääza la'tu. ²¹ Nani numbee Xtadä, nani rusoozba xtidxä, ni'c ruluiini sanälajzpacni narä. Luxh Xtadä sinälajzza nani sanälajz narä, näjza narä chanälazä bejnga, luxh suluiloä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtsnu, xhet näjdi loj reben guedxluijdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtadä, dxejc jiopläznäänuni guiro'pnu Xtadä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtadäni ni baxhal narä.

²⁵ 'Caniä guiraa rediidxre lojtu lañni yu'ä lojtu, ²⁶ per Sprit Dxan xten Dios nani jiädyacnäjtu, nani guxhal Xtadä xcuentä, laani suluiini lojtu guira'ti, näjza susnajni lajztu guiraa rediidx nani aguniä lojtu. ²⁷ Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajzpactu narä, sibalajztu xcuentä che guniä sia'ä lo Xtadä, sa'csi Xtadä

najc beñroru loä. ²⁹ Scree agunixgaäni lojtu, te che soobni, dxejcru chalilajztu xtidxä.

³⁰ 'Diruna guniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäjł gac recosre te gacbee rebeñ guedxliuj sanälazä Xtadä, rusobäza xtidx Xtadä, runä nani gunibeeni. Colchastie, colcho' jiunejznu ree.

15

Jesús najc si'c te yaguub

¹ Räpzani:

—Narä nacä si'c te yaguub. Xtadä najc si'c nani rusuj yajgga. ² Rebeñ najc si'c reñaa yajgga. Guiraa reñaa yajgga nani xhet cajdi lojni rutiu-ugnini. Luxh guiraa reñaa yajgga ni caj ninejxh lojni, rusianini te xcajru ninejxh lojreni. ³ La'tu anajctu beñnaya xcuent rediidx nani aguniä lojtu. ⁴ Colguibañnäj narä, sigajc ni nabañnää la'tu. Digacdi xcaj ninejxh lo te ñaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reñaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajcdi gunni. ⁶ Nani di chupac loä, sibicajni si'c reñaa yajg nani rdin sa'csi xhetru rcajdi lojni, dxejcti rbijdzni, rusäl bejñreni lo däj te checni.

⁷ 'Palga chupactu loä, palgaza chupac xtidxä lastootu, colnab nani rlajztistu, luxh narä sunidxäpacni. ⁸ Che gunpactu xtzun Dios, dxejc fi bejñ najcpactu xpenä, siliä'p bejñ xpala'n Xtadä, Dios. ⁹ Si'cpacni sanälajz Xtadä narä, sigajcza

sanälazä la'tu. Colchanuu lo xcälrinälazä. ¹⁰ Palga jiutu rextidxä, sinuutu lo xcälrinälazä, sigajc ni abasobä xtidx Xtadä, luxh rinuä lo xcälrinälajz Xtadä.

¹¹ 'Rniä rediidxre lojtu te guibalaznäjtu narä, te si'c guibalazduxhpactu. ¹² Dee najc diidx ni rnibeä guntu: colchanälajz sa'tu si'cni sanälazätu. ¹³ Xheti te yälsanälajz ni guroobru lo yälsanälajzre, gudeed te bejn xcälnabajnni, guetni lacuua resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ Diruna cuälaä "mos" la'tu, sa'csi di remos gan xhi rujn xlamreni. Luxh narä agulälaä la'tu "rexamigwä", sa'csi guira'ti rediidx ni biejn diagä lo Xtadä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn guedxliuj Jesús näjza rexpejnni

¹⁸ 'Palga cuälaz reben guedxliuj la'tu, anajntu agulälazxgaareni narä. ¹⁹ Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtadä, ni'cni rbälaz reben guedxliuj la'tu. ²⁰ Colsnaj lajztu diidx nani guniä lojtu, 'di te mos gac beñroru lo xlamnni'. Palga basacsíreni narä, susacsízareni la'tu. Palga rusooobreni xtidxä, susoobzareni xtiidxtu. ²¹ Guiraa recosre sunnäjreni la'tu xcentä sa'csi direni gumbee nani baxhal narä.

²² 'Paru dina niädniä lojreni direni niujn dojl xten xcälrdxechlajzreni loä, per ɳaj di gacdi guiniireni direni gacbee yu' xtojleneni. ²³ Nani rbälaz

narä, rbälazzani Xtadä. ²⁴ Palga dina niunä nez lojreni remilagwrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtadä. ²⁵ Bejnreni si'c te guzobj diidx nani cuaj lo guijtz agujc xchero: "Gulälazreni narä, luxh xhetlidi benä."

²⁶ 'Che jiääd nani gacnäj la'tu, laani sinii xcientä, chu nacä. Laani najc Sprit ni yu' lo Xtadä, siniini didxlíi. Narä suxhaläni lojtu; lo Xtadä guiriini jiäädni lojtu. ²⁷ Näjza la'tu siniitu diidx xcientä, chu nacä, sa'csi guyu'tu loä cheni gusloäli cagusule'ä diidxga.

16

¹ 'Rediidxre rnixgaä lojtu, te didi yu' xhi gun jiabtu te gunijttu lo xtidvä. ² Sidzujn dxej sibääreni la'tu dirureni gusaan jiu'tu neñ guidoro. Sidzujn or chutis ju't tejtu, suchaloni cayacnäjni Dios. ³ Guiraa recosre sujnreni sa'csi direni gumbeepac Xtadä, niclaza narä. ⁴ Agunixgaä rediidxre lojtu, te che guidzujn orga sinaj lajztu xcient rediidx ni guniä lojtu.

Redzuun ni rujn Sprit Dzan xten Dios

'Dina niniä rediidxre lojtu che gusloä cagusule'ä diidx, sa'csi sugarää la'tu. ⁵ Naj agojl guibi'ä loj nani baxhal narä, luxh nicla tejtu di guiniabdiidx: "¿Caro chäälü?" ⁶ Dxejc sa'csi aguniä recosre lojtu, ni'c cayac-huin lastootu. ⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu. ⁸ Luxh laani, che jiäädni lo guedxliujre, susanijni xcäriejn rebejn te gacbeereni xcient

dojl, näjza xcuent xcälnabañnaya Dios, näjza xcuent yälgxuxhtis xten Dios. ⁹ Guluiizani xcuent dojl lojreni sa'csi direni chalilajz xtidxä. ¹⁰ Guluiini xcälnabañnaya Dios lojreni sa'csi sibisacä lo Xtadä, luxh dirutu fii loä. ¹¹ Guluiini xcuent yälgxuxhtis xten Dios lojreni sa'csi abejn Dios yälgxuxhtis loj bendxbab nani rnibee lo guedxliujre.

¹² 'Yu' xhidajlru diidx rlazä guiniä lojtu, niluxh digacdi gacbeetureni ɳaj. ¹³ Che jiääd Sprit xten didxlili xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcuentcani, siniiitsni ganax rediidx nani gudeed Dios lojni te guinini. Siniizani xcuent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiinini lojtu. ¹⁵ Guiraa ni rajp Xtadä najc xtenä, ni'cni rniä suluiini xhixtenä lojtu.

Xcälrac-huin lajtu sibixloj ni yälrbalajz

¹⁶ 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtadä.

¹⁷ Dxejcti räjp rexpejnpacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtadä. ¹⁸ Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

¹⁹ Gucbee Jesú斯 xhini'c rlajzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcrubale'si dxej, suhuisactu loä. ²⁰ Rniliäpac lojtu,

la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. ²¹ Te gunaa che gaal xi'nni, rdejdni trabajw, dxejcti che aguyu' xi'nni, riä'l lajzni gudejdni trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu n̄aj, dxejcti che jiädhuisacätu, dxejc sii sibalajztu neñ lastootu, luxh rut gacdi gudzucajdi yälrbalajzga.

²³ 'Neñ redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtadä xcuentä, laani suniidxxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ 'Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtadä.

²⁶ Neñ redxejga guiniabtu por laä. Luxh dizana guiniä siniaabä narä loj Xtadä par la'tu, ²⁷ sa'csi lagajcza Xtadä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. ²⁸ Biriä lo Xtadä xhaguibaa, biälä lo guedxliujre, siunezáza lo guedxliujre, sibisacä lo Xtadä xhaguibaa.

²⁹ Räjp rexpejnpacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii. ³⁰ Naj sii gucbeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzpactu naj, ä? ³² Asiäddzungajxh teb or luxh ala bidzujn orga, che guire'chtu, cade teju xnez-xnejztu, te gusanxtebtu narä, luxh dina jianxtebä sa'csi Xtadä sugaranj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutip lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejnpacni

¹ Che gulujx guniini loj rexpejnpacni rediidxga, guläsni lojni xhaguibaa, räjpni lo Dios:

—Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa rebeñ guedxliuj, te gac gudeedni yälnabajn par tejpas lo guiraa renani badeedlu lojni. ³ Redee rajp yälhabajn par tejpas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

⁴ 'Narä gulä'pä xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ 'Loj rebeñ nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. ⁷ Naj agucbeereni guiraa rediidx ni guniä lojreni lojpaclu siäädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga,

agucbeepacreni lojlu biriä, ahuililajzreni lujpac baxhal narä.

⁹ 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejñlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ 'Narä diruna jia'nä lo guedxliujre, laareni sia'nrrureni lo guedxliujre. Luxh narä siälä lojlu. Xtagä ni najc Dxanro, gucnäj renani baniidxlu loä con xtiididxlu, nani baniidxlu loä te gunreni tejsi xhigab sigajcni riennu nurnu tejsi xhigab. ¹² Che guyunääreni lo guedxliujre, gucnää con xtiididxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³ 'Luxh naj sibisacä lojlu. Caniä rediididxre lał ni yu'ä lo guedxliujre, sa'csi rlazä guibaa lajzreni si'c ni rbaa lazä. ¹⁴ Abasule'ä xtiididxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵ Dina guiniabä cuää'lurenri lo guedxliujre, rniabä gudzucajlurenri loj beñdxab. ¹⁶ Direni gac bejn guedxliuj, sigajc ni dizana gacä narä bejn guedxliuj. ¹⁷ Basyareni con xtiididxlu, sa'csi xtiididxlu najc didxguliipac. ¹⁸ Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipaclu. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlazä gun

guiraareni tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajcza churení con nuurnu, te gacbee rebeñ guedxliuj luj baxhallu narä. ²² Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebeñ guedxliuj luj baxhallu narä, luxh sanälajzlureni si'cni sanälajzzalu narä.

²⁴ 'Xtadä, guiraa renani baniidxlu loä, rlazäza churení cadro chuä xhaguibaa, te fireni xcälrnibeä nani baniidxlu, sa'csi huinälajzlu narä galooli che gadli guirixtiej guedxliujre. ²⁵ Xtadä ni rujn cossa'ctis, di rebeñ guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶ Aräpä lojreni chu najclu; sápázaru lojreni te chu yälsanälajz sa' ni rajplu par narä neñ lastooreni, te cuäzäza neñ lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

¹ Che gulujx gunii Jesús rediidxga, huinäni rexpejnpacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejnpacni. ² Anajn Judas, nani guto' Jesús, caro rij Jesús con rexpejnpacni sa'csi si'csi-si'c rdxaaag sa'reni ro'c. ³ Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi

ananxgaani xhini'c sacni, gubigni lojreni, räjpni
lojreni:

—¿Chu rguiiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni sugaränjireni. ⁶ Che gunii
Jesús lojreni: “Laa naräni”, biäxhanreni, biajbreni
lo yuj. ⁷ Dxejcti gunabdidxsac Jesús lojreni:

—¿Chu rguiiltu?

Dxejc räjpzareni stehuält:

—Jesús nani siääd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguiiltu,
colgusaan jii redee.

⁹ Guniini rediidxga te gusojb rediidx nani guni-
ni che räjpni: “Loj guiraa ni baniidxlu, nicla tejni
di ninijt.” ¹⁰ Dxejcti Simón Pedr, sa'csi ca'ni te
spaad, guläännini, batiuugni diag ladbee xten xmos
bixhojzroga. Laj mosga najc Malco. ¹¹ Dxejcti räjp
Jesús lo Pedr:

—Guluchee spaad xtenlu neñ xpaguinni. ¿La
dina tedä trabajwdxh nani agunibee Xtadä tedä,
ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza
reguxhtis ni rnibee rexpejñ Israel, gunaaazreni
Jesús baliibrenini. ¹³ Dxejcti ganid huinärenini lo
Anás, sa'csi najcni xtadsueegr Caifás, luxh ijzga
biäjl najc Caifás bixhojzro ni rnibee lo rebixhojz.

14 Caifás najc nani balidx rexpejñ Israel nanab guet te niguii xcuent rebenguejdxga.

*Cadro gunii Pedr dini gumbee Jesús
(Mt. 26:69-70; Mr. 14:66-68; Lc. 22:55-57)*

15 Simón Pedr näjza stee xpejn_ñpacni huinajl dejtz Jesús. Luxh numbee bixhojzro bejña, biunäjzani Jesús lo xle' bixhojzro. **16** Bia'nti Pedr rolä'ga. Dxejc birii xpejn_ñpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. **17** Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn_ñpac Jesús, ä?

Räjp Pedr loj gunaaga:

—¡Xho gacäni!

18 Dxejcti sa'csi cayacnalduxh, caguse'creni boo te cagucha'lajzreni. Näjza Pedr sugaränjreni, cagucha'lajzni ro guibooga.

*Bixhojzro cayujn yälgunabdiidx lo Jesús
(Mt. 26:59-66; Mr. 14:55-64; Lc. 22:66-71)*

19 Dxejcti gusloj cayujn bixhojzro yälgunabdiidx loj Jesús xcuent chuni'c najc rexpejn_ñpacni näjza xcuent xhini'c ruluiini.

20 Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejñ guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejñ Israel, nicla tej diidx dina ninixhiga'tzädi. **21** ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

22 Che gulujx gunii Jesús rediidxre, te rexpejñ bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliibni baxhal Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejnpac niguiiga, ä?

Badzu'ni diidxga räjpni:

—¡Xho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä nen huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäjreni Jesús roliz Caifás, huinärenini roliz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire niajc te ben latsiaj, dinu niopnäni ladzñaa guejblu.

31 Räjp Pila't lojreni:

—Colchanäni, colhuii xho gunnäjtuni yälgxuxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

32 Guniireni si'c te guzojb diidx nani gunii Jesús xcuent xho guetni.

33 Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

34 Dxejcti räjp Jesús lojni:

—¿La lagajc luj rniiyu si'c, ä? O ¿laa yu' churen'i'c naj lojlu si'c?

35 Dxejcti räjp Pila't lojni:

—¿Xhixh näj narä nacä te xpejn Israel? Lagajc reben lajdxlu näjza rebixhojz bateedlu ladznaä. ¿Xhi bejnlu?

36 Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuua rexpenä te di tedä ladznaä rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

37 Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlü, reni'c ru-cuadiajgreni xtidvä.

38 Räjp Pila't lojni:

—¿Xhini'c najc didxlü?

Che guniini si'c gunisacni loj rexpejn Israel:

—Dina guidxälä nicla tej xtojl bejnre. ³⁹ Niluxh la'tu rajptu te costumbr, casob lani pascw, ruslaanu te bejn ni yu' nen latzguiib. ¿Xhi najtu? ¿La rlajztu guslaä ni najc reii xten rexpejn Israel, ä?

⁴⁰ Dxejcti guiragajcreni guredxa', räjpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguiib lojni. ² Bejn resoldaad te coronguejch, bazalrenini yejc Jesús. Dxejcti bahaujcwrenini te ladmoraad. ³ Dxejcti gusloj gubigreni lojni, te räjpreni lojni:

—¡Gubajn par tejpas Reii xten rexpejn Israel!

Dxejc huääzreni lojni.

⁴ Dxejcti birisac Pila't, räjpni lojreni:

—¡Colhui! Acabääni nez lojtu, te gacbeetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcnii, najcwzani ladmoraadga. Dxejcti räjp Pila't lojreni:

—¡Colhui! ¡Aree niguiire!

⁶ Ni'cni, che bahuii rebixhojzro näjza rexquixha-jgreni lojni, guredxa'reni, räjpreni:

—¡Colgucuaani lo crujz! ¡Colgucuaani lo crujz!

Räjp Pila't lojreni:

—Lagajc la'tu colchanäni te gucuaatuni lo crujz.

Per narä dina guidxälä nicla tej xtojlni.

⁷ Dxejcti räjp rexpejn Israel lo Pila't:

—Nuurnu rajpnu te leii, luxh xcient leiiga, nanab guetni sa'csi najni najcni Xi'n Dios.

8 Che biejn diajg Pila't rediidxga, bidxejbruni,
9 biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

10 Dxejcti räjp Pila't lojni:

—¿La dilu guinii loä? ¿La dilu gan narä rapä
 yälrnibee te gucuaälu lo crujz, rapäza yälrnibee te
 guslaälu, ä?

11 Räjp Jesús lojni:

—Xhetliidi yälrnibee niajplu loä paru dilu nica'ni
 xhaguibaali. Ni'cni bejñ nani bato' narä lojlu
 rapduxhruni dojl loj ni rajplu.

12 Ni'cni gudiil Pila't xho nuslaani Jesús, niluxh
 rexpejñ Israel rbedxaduxhrureni, räjpreni:

—Palga luj guslaaluni, dilu gac xamiigwreii César,
 sa'csi chutis ni rnii najcni reii, najcni xcontraar
 César.

13 Che biejn diajg Pila't rediidxre, gulääni
 Jesús, dxejcti gurej Pila't lo yagxhiil cadro rujnni
 yälguxhtis, cadro laa Litóstroros con didx-griegw
 sälöjni naga' guisa'c, con didx-hebreo laani
 Gabata. **14** Najcni dxej vispr lani pascw, si'cti
 läidxej, dxejcti räjpni loj rexpejñ Israel:

—Colhuii, aree xreiittu.

15 Ni'cni guredxa'reni räjpreni:

—¡Suguetni! ¡Suguetni! ¡Bacuaani lo crujz!

Dxejcti räjp Pila't lojreni:

—¿La sucuaä xreiittu lo crujz, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiinu.

16 Ni'cni bateed Pila't Jesús lojreni te
 chacuaarenini lo crujz.

Che bacuaarenini lo crujz

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nu-uní xcruzni, cheni bidzujnlireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo crujz. Bacuaazareni tio'p niguii lo stio'p crujz, tejgani te laad cuä' Jesús. ¹⁹ Dxejc bacuaa Pila't diidx ni chää yejc xcruzni; rediidxga najc scree: “Jesús, ben Nazare't, Reii xten rexpejn Israel.” ²⁰ Xhidajl bejn bil diidx ni caj yejc xcruzni, sa'csi lajt cadro bacuaarenini lo crujz najc gajxh ro'guejdxga, luxh didx hebreo, diidx griegw, näjza didx latiñ bacuaareni rediidxga. ²¹ Dxejcti räjp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni ɻeii xten rexpejn Israel”.

²² Dxejcti räjp Pila't lojreni:

—Nani abacuaä, abacuaä. Si'c jia'nni.

²³ Dxejcti resoldaad, che gulujx bacuaareni Jesús lo crujz, cua'reni rexhablojiaani bejnrenini tajp la', te cade tejreni cua'reni te la'ni. Luxh yu'stee xhajbni ni laa tunica, nadijbni, guejnni hasta lo yuj guc-cheeni. ²⁴ Ni'cni räjpreni lo sa'reni:

—Na'c guitiäjznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: “Batiäjsreni xhablojiaä; yejcza xhabä ni bia'n gudzujtreni daad.”

Ni'cni bejn resoldaad recosre. ²⁵ Niluxh cuä' xcruz Jesú suga' xnanni, con bäjl xnanni, ni laa Marii chää Cleofas, näjza Marii Magdalen.

26 Che bahuii Jesús loj xnanni, dxejc bahuiizani loj xpejñpacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

27 Dxejcti räjp Jesús loj xpejñpacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejñpacni xnan Jesús rolizpacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

28 Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

29 Ro'c suga' te guejs vinagr, nenga bahua-dxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni.

30 Che gulujx gu' Jesús vinagrga, räjpni:

—Agulujxni.

Dxejcti basajb yejcni, baslaani xaimni.

Xhi bejn te soldaad lo Jesús

31 Dxejga najc dxe vispr xte lani pascw, che ru' mandaad par lanijga. Rexpejñ Israel di rlajzreni nia'n rebejnga lo recrujz, sa'csi dxe sabdga najc dxej ni rusilajzreni. Ni'cni gunabreni lo Pila't gux-halni chu qui'ch ni'reni te guetreni, te jiäjtreni loj recrujz. **32** Dxejcti bidzujn resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga. **33** Che gubigreni lo Jesús, bahuiireni alagujtjni, direni nigui'ch ni'ni. **34** Tej soldaadga baqui'tzni te lans ro' xcustiini, dxejc bixe' rejn näjza nis. **35** Lagajc narä Juan bahuiä

recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. ³⁶ Sa'csi si'c gujc guira'ti, te guzobj xtidx Dios cadro caj: "Nicla tej xtzujtni di guech." ³⁷ Sigajcza lo stee guijtz caj diidxre: "Sidxelojreni loj nani biguijtz te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te beñ Arimatea, nacxhiga'tzni te xpejñ Jesús, sa'csi rdx-ejbni rexpejñ Israel, ni'c huijni loj Pila't, gunabni loj Pila't te laani guiliättni Jesús lo crujz. Cuäjbza Pila't, dxejc biääd José gulätni Jesús, sanätini to-goolga. ³⁹ Näjza Nicodem^m biääd dxejc, nani galoo huininäj Jesús te guxhijñ. Biädhäni si'cti tiuu kil te dänejxh ni najc si'c yaal ni laa mirra näjza áloes. ⁴⁰ Dxejcti cua'reni Jesús batejbrenini te la' lad lino, basälzareni däjga ni laa mirra con áloes, sa'csi si'c najc xcostumbr rexpejñ Israel che rucua'tzreni te togool. ⁴¹ Gajxh cadro cuaj Jesús lo crujz, yu' te huert, neñ huertga yu' te bacoob si'c te biliää, cadro nicla tej bejn gajd guiga'tz. ⁴² Sa'csi abidzujñ dxej vispr lani pascw xten rexpejñ Israel, luxh gajxh suga' biliääga, nenga gudixhreni Jesús; si'c biga'tztini.

20

Gubansac Jesús loj rebengut

(Mt. 28:1-10; Mr. 16:1-8; Lc. 24:1-12)

¹ Primer dxej xten xmaanga, cäjyru, gajd lo guedxliuj jianij che huij Marii Magdaleñ lo baaga. Che bidzujñni ro' baaga, bahuiini agubicaj guij

ni suga' ro' baaga. ² Dxejcti ruxuṇni gubi'ni te huiye'tzni lo Simón Pedr näjza lo stee xpejṇpac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuṇ Pedr näjza stee bejṅga, huijreni nez lo baa. ⁴ Ruxuṇ guiro'preni. Niluxh stee bejṅga ruxunduxhruni loj Pedr. Laani ganid bidzujṇni lo baaga. ⁵ Dxejcti guretäṇni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. ⁶ Dxejc bidzungajc Pedr, biugajcni neñ baaga, bahuiini naga' relajdga te laad. ⁷ Bahuiizani lajd ni guyu' yejcni, ni'c nie'tni saru, naga'ni te laad. ⁸ Dxejcti biu' stee bejṅga nani bidzujṇ ganid. Che bahuiini neñ baaga, huililajzni gubaṇsac Jesús. ⁹ Sa'csi gajdreni gacbee ni caj lo reguijtz, cadre caj nanab guibaṇsacni loj rebengut. ¹⁰ Dxejc gubisac guiro'p rexpejṇpacni rolizreni.

*Baluiloj Jesúš loj Marii Magdalen
(Mr. 16:9-11)*

¹¹ Laltis suga' Marii cuä' baaga, cayoonne. Ni'cni lał ni cayoonne, basajb lojni te bahuiini neñ baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadre gojt yejc Jesús, steeni nez cadre gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

14 Che gulujx guniini si'c, gubiréni, dxejc bahui-
ni loj Jesús suga' ro'c, niluxh dini niembee Jesús.

15 Dxejc räjp Jesús lojni:

—Nane', ¿xhicuent roonlu? ¿Chu rguiillu?

Marii bejn xhigab laa dade' ni rcanäj huertga,
ni'c räjpni lojni:

—Dad, palga luj sanäluni, gunii caro gudixhluni
te guiliäsäni te chanääni.

16 Dxejcti räjp Jesús lojni:

—¡Marii!

Dxejc gubiré Marii, räjpni nen xtidx hebreo:

—¡Raboni!

(Säloj diidxga “Mastr”.)

17 Dxejcti räjp Jesús lojni:

—Na'c guiniaazlu narä sa'csi gadna cha'a lo
Xtadä xhaguibaa. Huij loj rebetzä, huiye'tz
lojreni, cha'a lo Xtadä, näjza Xtadtu, loj Xtiozä näjza
Xtiooztu.

18 Dxejcti huij Marii Magdalen, bidzujñni loj
rexpejñpacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejñpacni

(Mt. 28:16-20; Mr. 16:14-18; Lc. 24:36-49)

19 Che gojl gudxej, najcni dumingw, primer dxej
xten xmaan, abiäudzu'tz ro lä' ro' yu' cadre tre' rex-
pejñpacni, sa'csi rdxejbreni rexpejñ Israel. Chela
bidzujñ Jesús, guzujni nez galäiireni, räjpni lojreni:

—Suchu yälrbedxi lastootu.

20 Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejñpacni che bahuiireni lo Dad Jesús. **21** Dxejc räjp Jesús lojreni stehuält:

—Suchu yäl̄rbedxi lastootu. Si'c ni baxhal Xtadä narä, si'cza ruxhalä la'tu.

22 Che gulujx guniini rediidxga, balejbni yejcreni, räjpni, lojreni:

—Suguibajn Sprit Dxan xten Dios nen lastootu. **23** Rextojl rebejn nani siällajztu, sibicajreni. Rextojl rebejn nani ditu jiällajz, siannäjreni redojlga.

Tomás bahuii lo Jesús ni gubansac

24 Tomás, ni laaza Didimo, najcni te retzubitio'p xpejñpac Jesús. Rutini che biääd Jesús loj rexpejñpacni. **25** Dxejcti räjp rexpejñpacni lojni:

—Abihuiinu loj Jesús, agubañsacni loj rebengut.

Dxejcti laani räjpni lojreni:

—Palga dina fiä loj reñaani cadro caj seen xten reclaab, palga dina guqui'tzä bicueñaä cadro guyu' claabga, guqui'tzäza ɳaa cadro bixal cuä'ni, di lazä chalii gubañsacni loj rebengut.

26 Che gudejd xhujn dxej, tresac rexpejñpacni nen yu', nadxaagza Tomás lojreni. Niäudzu'tz yu'ga, luxh chela gucbeereni abidzujn Jesús, guzunji galäiireni, räjpni lojreni:

—Suchu yäl̄rbedxi lastootu.

27 Dxejcti räjpni loj Tomás:

—Baqui'tz bicueñaalu ree loj patñaä, basälza ɳaalu cuä'äre, na'c ractio'p lajzlu, huililajzpac gubañsacä loj rebengut.

28 Dxejcti räjp Tomás lojni:

—;Xtadä, Xtioozä!

29 Dxejcti räjp Jesús lojni:
—Sa'csi abahuilu loä, Tomás, huililajzlu.
Chicbaa renani mase direni fli, rililajzreni xtidxä.

Xhicuent bacuaani reguijtzre

30 Xhidalroduxhru dzuun bejn Jesús nez loj rexpejnpacni, nani di nicaj lo guijtz. **31** Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn jiääd, Xi'n Dios. Luxh che chalilajz te bejn xtiidxni, sajpn̄i yäl nabajn̄ par tejpas.

21

Jesús baluilojni lo gajdz xpejnpacni

1 Dxejcti baluiloj Jesús loj rexpejnni ro' nisdoo ni laa Tiberias. Scree baluilojni lojreni. **2** Nadxaag sa' rebejñre: Simón Pedr, Tomás ni laaza Didimo, näjza Natanael, nani siääd Caná xten Galilee, rexí'n Zebedeo, näjza stio'p rexpejnpacni. **3** Dxejcti räjp Simón Pedr loj resa'ni:

—Chanazä bäjl.

Räjpreni lojni:

—Näjza nuure chonnu.

Dxejcti sääreni, huä'preni neñ te barcw. Guideb guxhijnga xhet bälldi gunaazreni. **4** Che acayanij loj guedxliuj, suga' Jesús ro' nisdooga, di rexpejnni niembeen. **5** Ni'cni räjp Jesús lojreni:

—Rexi'nä, ¿la xhet bälldi rajptu, ä?

Räjpreni lojni:

—Xhet rajpdinu.

6 Dxejcti räjpni lojreni:

—Colgusäl xquixhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten bar-cwga, dxejcti ameer diniajcdi nibääreni guijxhga ro'c sa'csi gudxadotzu'tzni bälj. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, got-gajcni xhablojiaani sa'csi ladxhagjiättis najcwni sa'csi canaaazni bälj, dxejcti gutiäjsni lo nisdoo. ⁸ Sgaii rexpejnpacni biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayäädx. Siädnázareni guijxh guidxa rebäjl. ⁹ Che bidzujnreni ro' nisdoo, bahuiireni re' guiboo, ro'cuzuub te bälj näjza yätxtiil cague'. ¹⁰ Dxejcti räjp Jesús lojreni:

—Coltanä gaii bälj nani entis gunaaztu.

¹¹ Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bälj neñ guijxhga, niluxh dini niräsyä' mase guyu' xhidalduxh bälj neñni. ¹² Dxejcti räjp Jesús lojreni:

—Coltaa te gauxharejntu.

Nicla tej rexpejnpacni dini niabdiidx lojni: “¿Chuluj?” sa'csi anajnreni laa Jesúsn. ¹³ Dxejcti cua' Jesús yätxtiil, badeedni lojreni, sigajcza rebäjl.

¹⁴ Dee naje ni riojñ huält baluilojni loj rex-pejnpacni, che gubañsacni loj rebengut.

Jesús rninäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chustee, ä?

Räjpní lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojn̄ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choq̄ huält: “¿La sanälajzlu narä?” Dx-ejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. ¹⁸ Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu ɳaalu te gushuajcw ste'ca bejn̄ xhajblu, te chanäreni luj cadre di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guilia'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejnni, nani sanälajzru Jesús, siädnajlni dejtzreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” ²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

22 Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

23 Ni'cni bire'ch diidx lagajc loj resa'ni, di bejŋga guet. Di Jesús niäjb lojni dini guet, alga räjpní: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

24 Luxh bejŋga najc narä, xpejŋ Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

25 Yu'ru xhidalduxhuzuun ni bejn Jesús. Palga gucuaanu guiralii redzuun ni bejn Jesús, nicla lo guedxliujre di gal chu reguijtz cadro xcajni.

**Xtidxcoob Dios ni biädnä dad Jesucrist
New Testament in Zapotec, Mitla (MX:zaw:Zapotec,
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
5cff1274-8dc3-5398-a94d-f6033bb363c9